

Mak

Suguek san Jon Jesus san dal ikubune ya

Mat 3:1-12; Luk 3:1-18; Jon 1:19-20

1 ¹Dal en bilalun uyanan Jesus Kristus Anut Nanun ninen o fun igane ya.

²Nek profet Aisaia wagam inanen buk lo igo igire,

“Ale. Naisag bilalun tamol ndininip, on nao na imug yau a.

Tamol an onane dal ikubune pano wa.”

³“Tamol ta san awan, tan kawan tamolpein an tia yak ate tubun mi iwagin dugo igo ibol:

‘An gidad Tubun en san dal akubune wa,

inanen dal turen yabi san akubune dop itaot mok ilasa wa.’”

⁴Agog Jon ipalug, tan kawan tamolpein an tia yak ate tamolpein isuguai dugo ilod dibilisap suguek dinane dop an lo inaned aupasek fidian Anut ipasi wan san ru man ifulale pidinai se ya. ⁵Aria, tamolpein a fidian Judea provins lo dumado dan, agod Jerusalem tamolpein wei mi dam Jon san ru dulon o diaug inisan na dilasa ya. Ante man inaned aupasek fidian mi walal te dubol ilasag, Jon dida you Jordan lo dudug isuguai idu ya. ⁶Aria, Jon inisan yamel man kamel fufulun lo duwei ak igane ya. Let man makau sunulon nam digane an luan te iyati a. Inanen ana man sis, agod garan san niniu mi yani se ya. In tamol kawan ak ago won itor se ya. ⁷Inanen bilalun ru tamolpein naod na ibol ilasa man igo ya. “Murnap tamol ta nai patug fo ipalu wa, tamol an san dabai naisag irinani geig a. Nai man inanen sendal nupasi san turug nusoluwip nitakoksi dop san kam nusupasi wo ta idaisuda na ya. ⁸Nai an you lo mi nusuguan a. Ak gug tamol en man Awan Urgan lo isuguan a.”

Jon Jesus isugui agod Satan ibitinae ya

Mat 3:13-17; Luk 3:21-22

⁹Saen an lo Jesus panu yan Nasaret Galili distrik lo yan ibiseig, you Jordan ate Jon san na yau a. Atna Jon Jesus isugui a. ¹⁰Nek saen a Jesus you ibiseig kuai te isuda man, kumaen panu san dalawan pasek go yen

dugo, Anut san Ur muluk on idug, in kabunan fufo imasi dugo ile ya.

¹¹Agog kumaen panu lo wagin ta idug igo ibol dugo ilon, “On man naineg Nanug, naineg bubeg mok, on nige wo ilog tubun mi uyanan da.”

Satan Jesus naon ikubiani a

Mat 4:1-11; Luk 4:1-13

¹²Agog gamu nam Urgun iduduwig tan kawan ak lo yau a. ¹³In aben ante nal kitek milaen mi, ad 40 tidom 40 sen imado dugo Satan ipalug, bitinaek lo igane ya. Aben ante mel kasik ak dam dumado na ya. Aria, Satan san bitinaek fidian itout go enel adi dupalug Jesus kagin dupani a.

Jesus inisan megeloum malmalan ak igiai a

Mat 4:12-22; Luk 4:14-15; 5:1-11; Jon 1:35-42

¹⁴Aria, kin Herod Jon yabig isubani dugug, Jesus yang Galili distrik lo ilasag, ante Anut san bilalun uyan ak walal te ibol ilasag tamolpein dulon se ya. ¹⁵In igo ibol, “Nal ilasa la ya, Anut san kagin panek an san saen sumeik a. Man ninen o an ilom ibilisa dop bilalun uyan nrupaian dan ilom lo rumok a.”

¹⁶Jesus You Galili san aen gigin fo itor dugo tamol ta tein da yil a. Tamol an imug yanan Saimon, in tein Andru da. Uraru an iy nalanal, ago yan lo inaned dob you lo dubal idu dugo, Jesus ipalu ya. ¹⁷Agog irupidai, “Inai nieg abag ari gup tamol anal san nipitenanan a.” ¹⁸Agog dob dubal yen dugo nien aban diri kisaek on a.

¹⁹Agog Jesus you aen gigin irig kitek isuda yau man, Jems Sebedi nanun an tein bakan ak Jon da yil a. Tamol uraru an wog fo iy dob duwe se ya. ²⁰Agog Jesus uraru mi igiai kisaek on go tamadi Sebedi wog fo tamol ibiai an dida dumado dugo dibisawaig Jesus nien aban dirig diau a.

Jesus tamol tinin lo ur saiak ikudig yau a

Luk 4:31-37

²¹Agog diaug, panu tubun yanan Kaperniam atna dilasa ya. Ubou nal, Sabat dubol dan lo, Jesus ubou ab ta lo iladug tamolpein ipitenanai o fun igane. ²²Ago dugo ru an dulon go durut saian. Man dugo, in nek ibol insiganed kubaiey san girek manau adi dupitenanai na yak on ago ta ipitenanai na ya. Tia, in tamol yanan tubun anda yak on ago ipitenanai se ya. ²³Aria, Jesus ru ibol dugo, ubou ab an lo tamol ta ur saiak ta aman da yak dam ate imado ya. ²⁴In awan tubun mi iwagin go ibol, “Jesus, on Nasaret tamol, on mansama na ata mel gane wo palu yak i? Nag on man daon panama wo palu i? Inai on nalon uyanan a, on Anut san gun tamol.”

²⁵Ak man Jesus ru dabai nam igo irupe, “On awa itau. Tamol en biseip lasa wau!” ²⁶Agog an lo ur saiak an tamol an yabig, ikinan isuruwor go in itarfuni a. Agog ur saiak an awan tubun mi isasai dugo ibiseig ilasa yau a.

²⁷Man ninen o tamolpein an fidian durut saian mok a, an lo in̄sed nug lo diñiñeñ se ya, agog igo dubol, “En so mel ta yak i? Nag piteñaneñ foun ak boi? In̄san ru dabai tubun aman da ya. In̄ ka ur sisaik ru kagin ipidinai dop in̄ awan duloñ pe dilasa diau a.” ²⁸An lo n̄iñeñ Jesus ninen o yan ririan ifufurak go panu fidian Galili distrik ilon lo yak ate yau a.

Jesus tamolpein subam amad da yak ikubune idu ya

Mat 8:14-17; Luk 4:38-41

²⁹In̄ ubou ab an dibiseig Jems Jon da diñal go dida Saimon in̄ Andru da sad ab lo diau a. ³⁰Pita raon subam ifunig tinin wananan go, gadab fo in̄siganen ab lo diganeg yen a. Man ninen o pein an ninen o Jesus durupeig ilon a. ³¹Agog Jesus yaug, pein an banin yabig itur o ibinawi a. Gamu nam subam an ibiseig pein an imasa kisaek oñ go anañ ikubune pidinai a.

³²Gurai isig ad idiau dugo, tamolpein fidian subam amad da, agod a ur saian saian amad da yan dam, diñal go dupalu ya. ³³Panu tubun an san tamolpein wei kasik ab san dalawan siñiren na dutumanig dumado se ya. ³⁴Ago man Jesus tamolpein wei mi subam funfun amad da yan ikubuniai dugo ur saiak wei mi dam tinid lo ikudai diau a. Ak man in̄ ur saiak adi ninen o diñiñeñ san ninen o ipadau a, man ata wo, ur adi amaiak Jesus enti mok an duloñ fufei a.

Jesus aben tamolpein tia yak ate Anut lo igudani a

Luk 4:42-44

³⁵Tidom lom mok, saen ad gamugo ilasa dugo, Jesus imasag ab an ibiseig aben ta yoitout ak lo yau a. Ante man Anut ninen o igudani se ya. ³⁶Ak gug Saimon in̄ turan dida dumado yan, Jesus abañan dile wo n̄ien aban dirig diau a. ³⁷Saen in̄ dile man durupeig dubol, “Fidian mi oñ dilio wo abañ diabi da.”

³⁸Ak man Jesus awad yabig ibol, “Id panu aenta siñired na dien dan lo tau a. An lo ate dam n̄ai ru ka n̄fulale pidinai a. Man ata wo, urat nek en n̄igane wo n̄ilasa ya.” ³⁹An lo man in̄ Galili distrik ilon lo tureñ yabi se ya, sad ubou ab fidian lo ru ibol ilasa dugo ur sisaik tamolpein tinidi lo yan dam ikudaig dilasa diau a.

Tamol ta tinin lepra yafutani a

Mat 8:1-4; Luk 5:12-16

⁴⁰Nal ta man tamol ta tinin lepra yafutani an ipalug isumiani wo turun isoluwig irupe, “Oñ ilo ibol tap, n̄ai kubuniag pe tinig uyan ilasa da wa.”

⁴¹Agog Jesus ilon tubun mi imuñani tag banin iwateg yabig ibol, “Ubol agom n̄ai ilog ago yen da, uya lasa.” ⁴²Agog lepra ibiseig yau dugo tamol an tinin uyan ilasa kisaek oñ a.

⁴³Agog Jesus tamol an ru dabai nam ru kagin irupe. In ririan idinig yau o niŋen o igo ibol. ⁴⁴“Kagin gane, kulob ilasa yen niŋen o aenta ta rupidai na wa. Tia, itaot waup, tini Juda sad pris mi kubiaip ile dop, mudan a Moses san kubiaen lo ibol an ŋanep Anut yai gane pani. An lo dop tamolpein duloŋ ak oŋane subam itout a.” ⁴⁵Gug tamol an yaug, mel en Jesus igane an niŋen o ibol itilani se ya, an lo ru an panu panu lo yau a. Man niŋen o Jesus in fon panu tutubu yak lo walal te iladu san tia ya. Amaiak niŋen o in aben tamolpein tia yak ante mi imado dugo tamolpein baŋen fidian lo yan inŋsan na dupalu se ya.

Jesus tamol subam anda yak tinin iganeg uyan a

Mat 9:1-8; Luk 5:17-26

2 ¹Nal wei tiag Jesus fon imul panu Kaperniam na ipalu ya. Agog tamolpein Jesus ante imado dan niŋen ru duloŋ a. ²An lo tamolpein wei mi inŋsinan ab lo dupalug dutumani a. Ab an ilon lo nug dusupini dugo patun fo dam ab dalawan siŋiren na aben tia ya. Ago dugo Jesus Anut san ru ifulaleg duloŋ se ya. ³Ago dugo tamol iwoiwo in tamol ta ŋien banin fidian itubabun ak kapal anda Jesus giranen na disinig dupalu wo digane ya. ⁴Ak man tamolpein mi dal dufutani an lo in diau san dal tia geig a. Ago tag ab patun fo tet fo disidag diaug, ab aten lak na katik^a nam gubak mi digane an fo digansi a. Ago yen dugug mutunuk ta fuŋ fufo diganeg diabigigeg gug mutunuk an lo tamol kapal anda yan duyuweg, Jesus imado dugo naon na digane idu ya. ⁵Agog saen Jesus inaned ilo rumok ile man tamol an irupeig ibol, “Ŋaineg nanug, ŋai oŋane aupasek fidian ŋusuas yau la ya.”

⁶Aria, ate man kubiaen san girek maŋau aenta dumado ya. Inŋsan ru ibol en duloŋ go an lo ilod igo weiwei se ya. ⁷“En ata wo ru naon ago ibol ak i? In Anut lo ru kukok igane da! Ak dugo, tamol ta in ka aupasek isasi yau ak i? Tia geig, kulob an Anut san mi a.”

⁸Gamu nam Jesus ilon lo, tamol an kankan dugoma digane se yan ilon uyanan a. Ago tag in igo irupidai, “An ata wo ilo wei igo agane dak i? ⁹Dugomaiak pasauman ak i? Ŋai ŋabol, ‘Oŋane aupasek ŋupasi yau o?’ Tia, ŋabol, ‘Oŋ masap kapal ŋanep utor a?’ ¹⁰Ak gug kulob e ŋiganep an lo ŋai, Tamol Nanun, tan en lo Anut wagen lo aupasek ka ŋupasi yau amaiak aloŋ o ...” ago ibol go tamol a ŋien banin tubabun aman irupe, ¹¹“Oŋ masa utur pe oŋane kapal ŋanep siŋane ab lo wau.” ¹²Agog tamolpein malad lo man, tamol an imasa kisaek oŋ go san kapal yabisag isinig kuai te ilasa ya. An lo man in fidian durut saian mok dugo Anut yaŋan diabisa dugo dubol, “Maŋ kulob ta naok igo yak gubak mi mileu man tia geig a!”

^a Foi

Jesus in Livai iwagi a
Mat 9:9-13; Luk 5:27-32

¹³Murnag Jesus fon yaug you tilianek san loŋ na itor dugo tamolpein malan tubun mok dutumanig Jesus dubuluwig maŋau ipidinai se ya. ¹⁴Jesus you aen gigin irig isuda yaug ab ta, ate tamolpein sad na moni takis diŋane dak ate ilasa man, takis ŋilaŋal tamol ta imasig imado dugo ile ya. Tamol an yaŋan Livai, Alfeus nanun. Agog irupe, “Ŋieg aban uri.” Agog Livai imasa go ŋien aban iri a.

¹⁵Murnag saen Jesus Livai san ab lo imasig imado dugo sisem anan diani man, takis ŋilaŋal wei mok agod “aupasek tamol” wei mi dam, dupalug dumasig Jesus iŋanen megeloum dida anan diani a. Man dugo, tamolpein a ŋien aban diri se yan wei mok a. ¹⁶Kubiaeŋ san girek maŋau adi luluaŋ lo ensauta a in dam Farisi adi amaiak mel en Jesus megeloum dida digane dan dile dugo iŋsan megeloum adi igo dusumianai, “En ata wo tamol en takis ŋilaŋal tamol adi agod aupasek tamolpein dida sisem anan diani dak i?”

¹⁷Ak man Jesus iŋsad sumianek ilon go irupidaig ibol, “Tamolpein a tinidi uyan an dokta san na ta diau na da, tia, tamolpein subam anda yak mi ago digane da. Ŋai tamolpein itaot adi ago dubol dak ŋigiaip dupalu san niŋen o ta ŋupalu na ya, tia, aupasek tamol anami ŋigia i o ŋupalu ya.”

Anan lo geg digane an niŋen o Jesus dusumiani a
Mat 9:14-17; Luk 5:33-39

¹⁸Aria, nal ta lo suguek san Jon iŋsan megeloum adi agod Farisi adi dam in anan lo geg diganeg dumado se ya. Tamolpein ta Jesus san na dupalug dusumiaeŋ, “Jon san megeloum agod Farisi adi dida nal kadi anan lo sed geg ipidinai da, ago gug ata wo onsiŋane megeloum anan lo geg ta digane na dak i?”

¹⁹Agog Jesus awad yabig igo ibol, “Tamol ta iwon da sad nug ŋanek san saen an ilom isou a. Ak dugo, saen tamol an iŋanen turan muroun dida dumado dop, anan lo geg digane wak i? Tia ya. Saen in dida dumado dan waliŋ digane san tia geig a. ²⁰Gug nal ta ipalu dan te gup, Anut in nug ŋanek san tamol an ipasi yau pidinai a, nal an lo man waliŋ digane wa.”

²¹“Tamol ta yamel kilaken ta ikukuik na yan ta irasirep ate yamel wagam ak san mutunuk ta iwei na da. Man dugo, ago igane tap, yamel kilaken foun an yamel wagam an irae dop fon irasire dop daon ipani wa. ²²Agod tamol dam wain foun ak bilelek suŋulon wagam ak lo ta diwali na da. Man dugo, ago digane tap, wain foun an iŋanep bilelek suŋulon wagam an ikafut yaup ipuk dop, wain ikulmaek pe tan fo idu dop, bilelek

sunjulon dam daonj ipani wa. Fun an ninjen o inj wain foun ak bilelek sunjulon foun ak lo mi diwali da.”

Ubou nal san Tamol Tubun a

Mat 12:1-8; Luk 6:1-5

²³Ubou nal ta lo Jesus kon san abi ilon lo itor se ya. Ago dugo injsan megeloum inj kon aenta dufunig fun diganeg diani se ya. ²⁴Gug Farisi adi dil tag Jesus durupei, “Ule, en ata wo kagin a Sabat nal lo tigane san ninjen o idsad kubiaenj ipadau amaiak gamu onjane megeloum adi digane dak i?”

²⁵Ago man Jesus injsad awa biek ru naon irupidaig ibol, “Nag mel e Dawid igane yen ta asuti na i? Dawid inj turan muroun dida kadag san saen lo dimatigen dugo ananj o katuk amadi a. ²⁶Mel en wagam mi saen Abiatar inj pris gurman imado dugo ilasa ya. Aria, Dawid Anut san ab lo iladug, bret a Anut naon na didirig dien an injaneg yani a. Ak man bret an inj lo geg a, nek Anut san pris inj mi ka diani wa. Ago bo man inj dam injanen yu tamol adi bret aenta iwae pidinaig diani a.”

²⁷Agog Jesus fon irupidaig igo ibol, “Tamol inj ubou nal san mel, ago Anut ta igane na ya, tia geig. Ubou nal man tamol san mel, nek ago mi igane ya.

²⁸Fun amaiak ninjen o, Tamol Nanun man ubou nal an dam injsan muroun a.”

Sabat nal lo Jesus tamol ta banin saian ak ikubune ya

Mat 12:9-14; Luk 6:6-11

3 ¹Nal sen ta lo Jesus ubou ab lo iladu ya. Tamol ta tuon ikurnjak yau ak ante imado ya. ²Tamol aenta ate dumado dan inj Jesus tinin fo ru digane wo dal abanj dile se ya. An ninjen o inj maladi ti ibol dugo Jesus ata mel igane wo dak dile san tawanj an digane se ya. Inj tamol e banin ikurnjak yau en Sabat nal lo ikubune tap, an ninjen o boum dupani wa. ³Aria, Jesus tamol e banin saian en irupei, “Onj masap, titijaem utur.”

⁴Agog Jesus tamol en isumianai, “Kubiaenj dugo ibol ak i? Ubou nal lo, id ka kagin uyan ak tigane wo? Tia, kagin saian ak tigane wak i? Patu pasek tupani wo? Tia, tufuni imat ak i?” Ago man inj fidian tok dubol go dumado ya.

⁵Jesus yil ilubanoi dugo nijedi wo tinjaen wananan idu dugo ilon tubun geig ipapao se ya, man dugo, inj bubedi man dabai geig a. Agog Jesus tamol en irupeig ago ibol, “Onjane bani itaot wate.” Agog inj banin iwateg, uyan ilasa kisaek onj a. ⁶Agog Farisi adi kuai te dilasag silei nam inj kinj Herod san warou adi dida sisem fun diganeg palaen an dumari a. Inj dugo wonj Jesus daonj dupani wak o nug lo dukubiai ila iso se ya.

Tamolpein doup tubun Jesus san na diau a

Mat 12:15-16; Luk 6:17-19

⁷⁻⁸Agog Jesus injanen megeloum dida dugursig you saltek san lonj na dudu diau a. Ago dugo Galili tamolpein malan tubun Jesus njen aban

fo diau a. Tamolpein tan titin wei mi kulob naok naok Jesus igane na yan ningen o dulong an lo insiganed panu panu dibiseig insan na dupalu ya. Tan Judea adi wei mi dam dutumanig Jesus dirig diau a. Tamolpein malan tubun, Jerusalem na yak, Idumea provins lo yak, you Jordan aen ate yak, Taia in Saidon da sad long na yan dam dususag dutumani a. ⁹Agog Jesus insan megeloum adi irupidaig, in gidad wog ta dijanep, sumeikan dususep yen dop fo isuda wo ibol. Man dugo, tumanek tubun mok in dubuluwi se ya, kabelan in tinin dupini saian banau. ¹⁰Man dugo, in imug mi tamolpein wei mi ikubunia a. An lo tamolpein a subam ad da yak fidian dususag dubuluwig Jesus tinin kitek diabi dile wo in lo dututou se ya. ¹¹Agod saen ur saiak saiak talpein tinid lo yan Jesus dile man, talpein an Jesus naon na turud dusoluwig awad tubun mi diwagin go dubol, “On Anut Nanun mok.” ¹²Ak gug Jesus in ru kagin dabai geig ipidinaig ago ibol, “An niai enti mok an ningen o tamolpein ta arupidai na wa.”

Jesus megeloum 12 ipilianai a

Mat 10:1-4; Luk 6:12-16

¹³Jesus tan bubun ta ate isidag, tamol adi dugomaiak insan dilasa wo ilon yen an igiaig dususag insan na dilasa ya. ¹⁴⁻¹⁵Agog in tamol 12 ipilianaig, in dida megeloum adi igo won dumado dutor na ya. Murnap idiraip diau dop ru dufulale wa, agod in dam ur sisaiak tamolpein tinidi lo yan dukudaip diau san dabai amad da ya. ¹⁶⁻¹⁹Aria, megeloum 12 e itarpasai en yanadi igo ya. Ta Saimon, in Jesus yanan foun ak Pita ipate. Ta Jems, in tein Jon da, nuod urarum Sebedi nanun muroun, uraru en Jesus yanadi foun ak Boargenes ipate ya, (yanak an fun man weil fufu tamol.) Ta Andru, ta Filip, ta Bartolomiu, ta Matyu, ta Tomas, ta Jems in Alfeus nanun, ta Tadeus, ta Saimon in ru wagai san tamol, agod Judas in man panu Keriot san tamol, emaiak murnag in Jesus ningen o palan imarig ager tamol banid lo igane ya.

Jesus Beelsebub ida urat digane dak ago dubol a

Mat 12:22-32; Luk 11:14-23; 12:10

²⁰Aria, Jesus turan ta san ab lo iladu dugo tamolpein wei geig dupalug fon dutumani a. In inanen megeloum adi dida dusupinai se yan lo anan diani san tia geig a. ²¹Saen Jesus muroun muroun in mel emaiak ningen o dulong man, dumasa saian go sad panu dibiseig Jesus diabi wo dupalu ya. Man ata wo? In dubol, “In burau ifuni da.”

²²Agod kubiaen san girek majau ensauta a Jerusalem na dupalu yan in dam igo ibol, “Tamol en tinin ilon lo man ur saiak Beelsebub anda ya. In ur sisaiak sad gurman inanen dabai nam ur saiak aenta tamolpein ilod lo yan ikudaig diau da.”

²³ Ago tag Jesus igiaig iŋsan na dupalug ru mitilaen funfun nam irupidai duloŋ se ya. “En dugo woŋ pe Satan iŋ ka sen ikudip yau ak i? An ago igane san tia geig a! ²⁴ Kiŋ san kagin panek aben lo, iŋsan tamolpein sed itarpalaip malan uraru dilasap nug dufuni tap, kiŋ an san kagin panek aben an dabai itur san tia geig a. ²⁵ Agod warou kisaek san tamolpein iŋ tarpalek uraru dilasap nug dufuni tap man, warou an dam dabai itur san tia wa. ²⁶ Agod Satan iŋ sen yu iganep an lo iŋ muroun muroun sed itarpalai tap, aria, iŋ dabai itur san tia dop iŋanen dabai itout a. ²⁷ Ak man tamol ta iŋ tamol dababai geig ak ta san melmel isini wo iŋanen ab lo iladu san tia ya. Tia geig a. Iŋ gidad imug mi tamol dababai an rasau nam isubani gup, iŋ ka tamol an san ab lo iladup melmel isinip yau a.

²⁸ Ijai rumok ŋurupaiaŋ da, aupasek fidian agod nao futek ru fidian dam tamolpein digane dan Anut ka isuas yau a. ²⁹ Ak gug talpein ta iŋ Awan Urgun naon ifute tap, aupasek an Anut ta isuas yau na wa. Tia, iŋanen aupasek emaiak pempem mi yen yau a.” ³⁰ Jesus ago irupidai a, man ata wo, tamol amaiak imug mi iŋ niŋen o, “Tamol en ur saiak aman da yak,” ago dubol a.

Jesus tinan agod tein muroun

Mat 12:46-50; Luk 8:19-21

³¹ Saen nek an lo Jesus sinan tinan iŋ tein muroun dida dupalug kuai te dumado ya. Ago dugo tamol ta didinig ab ilon lo yaup Jesus kuai te ilasa wo irupe i a. ³² Ago dugo tamolpein wei kasik Jesus siŋiren na dumasig dubuluwig dumado se ya. Ago dugo aenta iŋ durupeig dubol, “Uloŋ ak, oŋane tina tei murou dam kuai te dutur da, oŋ iŋsad na wau o digio da.”

³³ Ak man Jesus awad yabig ibol, “Ensauta mok ŋaisag tinag muroug, teig muroug ak i?” ³⁴ Ago dugo malan yaug tamolpein giranŋen na dumado dan yil go ibol, “Ijaisag tinag di teig muroug nek en mi a! ³⁵ Tamolpein ensauta a ŋai Tamag kumaen panu lo yan ilon duri dupani dan, nek anami ŋaisag teig, lug di tinag muroug a.”

Anaŋ kubulan bilabal tamol san ru faŋan

Mat 13:1-9; Luk 8:4-8

4 ¹ Murnag Jesus Galili san you tilianek ate yaug loŋ na imado dugo afon fun iganeg tamolpein ipiteŋanai se ya. Agog tamolpein wei mi iŋsan na dususag dutumani itilani a. Saen an lo doup tubun mok. Ago tag Jesus wog lo isudag imasig imado dugo tamolpein fidian dutumani man loŋ na ditur se ya. ² Ante man Jesus ru faŋan lo mel wei mi niŋen o irupidai se ya. Ru ta ago irupidaig ibol, ³ “Aloŋ. Saen ta lo tamol ta ai patun isinig abi lo ipae wo yau. ⁴ Yaug siŋanen abi lo man ai patun banin igane inawaig tan fufo iratitale se ya. Saen ratitale man, ai patun aenta

dal fufo dudu ya, agog anakanak dupalug diani itout a. ⁵Ai patun aenta tan pat anda yak fufo dudu, tan ate man kuror an tia, agog milaen tiag ai patun an balud isa, man dugo, tan an kuror an tia ya. ⁶Ak man saen ad isuda man ai baludi an dukurjak diau a. Ai an dam dabidi tan lo ta idiau geig na, an lo dukurjak diau kisaek on a. ⁷Ai patun aenta ud saian an lulujad lo dudu, agog sisem disag diau dugo ud saian an ai uyan ak yafutani an lo nujon ta igane na ya. ⁸Ak man ai patun aenta tan uyan ak fufo dudu man nujon digane, kadi patudi 30 dilasa, aenta 60, aenta 100.” ⁹Agog igo ibol, “Tamol on kududo ama da tap, ru an ulon uyanan a.”

Jesus ru fajan san fun ifulale ya

Mat 13:10-17; Luk 8:9-10

¹⁰Saen Jesus sen kisaek imado dugo, inanen megeloum ¹²agod tamolpein aenta dida diaug, Jesus ru fajan ibol ilasa amaiak ninen o dusumiani a. ¹¹Agog igo ibol irupidai, “Anut san kagin panek an san melmel imianuk an fidian ipana on a. An lo on mel en fidian ilom itarpasi san ninen o alon uyanan a. Ak man tamolpein patun fo dumado dan, in bo ru fajan dulon ak gug, ru an san fun mok ta dulon na ya. ¹²An lo man,

‘In bo malad pempem yau a, ak man ilod ta itarpasi na wa,
agod kududod nam dulon bo man, fun mok ta dulon na wa.
Tia dop, nag in ilod ibilisa dop sed itilianaip Anut insad aupasek
isuas yau a.’”

Ru fajan an san fun

Mat 13:18-23; Luk 8:11-15

¹³Agog Jesus irupidai, “Ak dugo, on ru fajan en ninen o ilom ta itarpasi na yak i? Ago tap, en dugo won pe on ru fajan aenta fidian dam alon fufei wak i? ¹⁴Tamol ai patun iratitale den, in Anut san ru ipae da. ¹⁵Tamolpein aenkadi man ai patun dal te yak ago ya. Ate Anut san ru dipae da. Saen ru an dulon ibol ak, Satan ipalup silei nam ru an ilod lo ipasi inane yau da. ¹⁶Aenta man ibol ai patun tan sagar ak fo idu igo ya, nek anami ru dulon dop yousai amad da ilod lo rumok kisaek on a. ¹⁷Ak gug in dabid tia yak ninen o saen kitekan ka dutur gup, muruan ilasa boi, tia, dukudai dop madai dinane boi, an lo dop ririan dibilanip dudu wa. Nek ago mi insad ilo rumok itout yau a. ¹⁸Aenta man ud lulujad lo idu ya. Enami ru dulon pe ilod lo rumok a. ¹⁹Ak gug tan en san ilo weiwei, agod filian san mala bulbal di mel aenta sad ilo masa dam, disaurip itilanip ru an ipapao da. Ago dop ru an nujon ta ilasa na wa. ²⁰Aria, ai patun tan uyanan fufo idu man, tamolpein ru rumok an dulon pe san fun dam dulon sijaokan a. Talpein an in mok nujon ifu wa, aenta nujon 30, aenkadi 60, aenta 100, nujon ago ifu wa.”

Lam san ru faʻan

Luk 8:16-18

²¹Agog Jesus ru faʻan taidam igo ibol a. “Ak dugo, aʻn lam asulani dop, ab ilon lo daeg paen na boi, tia, sareg paen na boi, aguni itur dak i? Tia geig a. Aben lak na yak ate asuʻani wa. ²²Man dugo Anut ilon igo ya, mel fidian gamu mianuk lo yen den, murnap walal te ilasa wa. Agod mel ta dutuani an, nal idu dop ad lo ilasa wa. ²³Tamol oʻn kududo ama da tap, ru an ulon uyanan a.”

²⁴Agog Jesus fon irupidaig igo ibol a. “Aʻn gidad ru e alon den nigen o kankan aʻane wo uyanan a. Man ata wo? Tou sapita aʻn tamolpein aenta apidinai dan, tou nek ago yak nam Anut mel ipanaʻn a, agod mel taidam itumani panaʻn a. ²⁵Talpein ta melmel aenta da yan, Anut taidam ipani wa. Ak gug talpein ta iʻn melmel tia, mel kititik a aman da yan, an dam Anut iʻn banin lo ipasi yau a.”

Ai patun isa dan san ru faʻan

²⁶Jesus fon igo ibol, “Anut san kagin panek man igo ya. Tamol ta anaʻn patun tan lo iratitale ya. ²⁷Tidom ad, gidad tamol an yen boi, tia, imasap itor boi, ai patun an balun isap tubun ilasa wa, ak man dal dugo won mel en ka ilasa man iʻn ta ilon na wa. ²⁸Tan sen mi iganep balun isap, roun iganep yau dop boban ilasap, rugun iganep, nuʻon ifu wa. ²⁹Ak man tamol en saen anaʻn isulot idu yan ile man, bubarek iʻnanep, yaup, anaʻn iʻjane wa. Ata wo, anaʻn panek san nal idu ya.”

Ai patun kititik aman kawan ak san ru faʻan

Mat 13:31-32,34; Luk 13:18-19

³⁰Fon igo ibol, “Anut san kagin panek nigen o ata ru man ate tou ʻnabip alon ak i? Ata lo ʻnʻututunap ʻnabol pe ilom itarpasi fufei wak i? ³¹Tamol ta ai yaʻan mastet dubol dan patun iʻnaneg siganen abi lo yaug ipae ya. Ai an san patun man kititik aman kawan, tan lo pae wa. ³²Ago bo man, saen paep isa den yaup ai tinan oʻn ilasa dop an lo ai aenta iriʻnanai a, agop raen dam idirip ibalsarer dop kuseʻn ka ate wur dufuni wa.”

³³Jesus iʻn ru faʻan nek ago yak wei mi lo Anut san ru irupidaig dulon se ya. Ru sapita dulon go ilod itarpasi wo uyan an mi iri panim, nek ago ibol idu se ya. ³⁴Iʻn pempem tamolpein malad lo mi ru faʻan funfun nam ibol ilasa na ya. Ak man saen iʻnsan megeloum adi dida sed kisaek dumado dugo, ru faʻan an fidian sad fun mok iʻn kuai te ifulale idu dugo dulon a.

Jesus tim beig da irupidaig tok dubol a

Mat 8:23-27; Luk 8:22-25

³⁵Nal kisaek an lo gurai isi dugo, Jesus iʻnanen megeloum adi irupidai, “Id wog nam you aen ate tau a.” ³⁶Man nigen o megeloum adi doup

dibisawaig, wog lo disuda ya. Saen Jesus inj wog lo isuda man dijaneg ida diyawaig diau a. Wog aenta dam sisem diau se ya. ³⁷Agog tim tubun ak ifure ya. Ago dugo you tubun geig imasag ibalsinig wog ilon lo iladu se yan lo wog isarir o igane ya. ³⁸Ago gug Jesus man inj wog taen te kalik iganeg yen padal a. Ago tag megeloum adi diaug dufufunig durupe, “Girek manjau, id tumayau o tator da. Onj ata wo idsed o ilo ta isou na dak i!”

³⁹Agog Jesus imasag, tim tamun da ipidaig igo ibol, “Itout! Tokabol!” Agog tim ifure na yan itout dugo you malin idu geig a.

⁴⁰Ago gug Jesus injan megeloum adi irupidaig ibol, “Anj ata wo tubun mi arer dak i? Ak dugo, anj nen gamugo ilo rumok amam da i?”

⁴¹Jesus ago ibol dubo man inj dumasa saian dugo tubun kasik direr se ya. Ago dugo injed nug dusumiani, “Tamol en enti mok i? Gidad tim tamun da dumasa yak dubo man awan duloj a.”

Jesus tamol ta ur sisaiak anda ikubune ya

Mat 8:28-34; Luk 8:26-39

5 ¹Aria, inj wog nam you aen ate diaug, Gerasin sad abanj lo disasau a. ²Saen Jesus wog an ibisei man, tamol ta mutou ibiseig ipalu ya. Tamol en ur saiak aman da ya. ³Inj mutou funfun lo imado na ya. Tamol aenta fon dusubani san, sein nam dam ta idaisuda geig na ya. ⁴Saen wei mi banin ain didirig rasau sakar kasik ak nam njen banin dusubani a. Gug saen fidian inj rasau lubuj an ain dam ituteg isubari idu ya. Tamol an injan dabai san fun man senamo geig a, tamol diabi anen tia ya. ⁵Nal fidian, tidom ad, mutou ilod lo, tan bubun fo dam isasai iwaginj dugo pat luon anda yak nam tinin ititale na ya.

⁶Aria, tamol en asau mi Jesus ile man, imaspalug yang san na ilasag naon na turun isoluwi a. ⁷Agog awan tubun mi isasai dugo igo ibol, “Jesus, Anut lak na geig ak Nanun, onj mel ta naj lo i? Onj ru lak na geig ak nam Anut malan lo rupeip ubol, madai tubun geig ta panag na wa.”

⁸Inj Jesus ago isumiani a, man dugo, Jesus inj imug mi ur an irupe, la yak igo ya, “Onj ur saiak, tamol en biseip lasa wau!”

⁹Aria, agog Jesus ur saiak an isumiani, “Onj yang enti ak i?”

Agog inj awan yabig igo ibol, “Nai yang Legen,^b man dugo, manj wei kasik a.” ¹⁰Agog inj afon mi Jesus ilon injane onj se, agog Jesus ikudai dop idiraip aben an ta dibisei na wo isumiani se ya.

¹¹Aria, kitek asau tan bubun luan te man, bor malan tubun geig ak dunuaen se ya. ¹²An njen o ur sisaiak adi Jesus san na dumosiaig ago dubol, “Onj kudamap bor an lulujad lo mau. Ulefunamap bor ilod lo ka miladu wa.” ¹³An lo Jesus awok ibol tag, ur sisaiak adi dilasag diaug bor

^b Yang Legen fun man sawar tubun a.

tinidi ilon lo diladu ya. Agog bor an fidian mi, sad sutek 2,000 igo yak, in dumasag damab aen te dumaspalu dudug you duluk go dumat pasik a.

¹⁴Tamol bor kagin dupidinaï den disol go dumaspalu on diaug, mel ilasa yan ningen o tamolpein panu tubun ak lo yan, agod a gidigheid dumado dan, durupidaig dulong a. An lo man tamolpein in mel dugo mok ilasa amaiak dile wo dupalu ya. ¹⁵Saen Jesus san na dilasa man, tamol imug mi ur sisaïak anda yan dileg durut dugo direr saian geig a. Man ata wo, gamu tamol en idagom dugo kankan uyan uyan aman da, ago dugo yamel sen ipulaug imasig imado dugo dile ya. ¹⁶Agod tamolpein a insiganed malad nam mel a ilasa dugo dile yan, in tamolpein dupalu yan mel dugo mok ilasa yan durupidaig dulong a. Ago dugo mel dugo ilasa yan tamol lo agod bor lo dam, durupidaig dulong a. ¹⁷Man ningen o tamolpein an fidian awad dutumanig Jesus inaned aben ibiseip yau o ago dumosiai se ya.

¹⁸Saen Jesus wog lo isuda dugo tamol e Jesus ikubune yan ida diau o maeg iganeg isumiani se ya. ¹⁹Gug Jesus awan ta yabi nag igo ibol irupeï, “Onsigane murou sad na waup, Tubun en ilo mujanek sapita ipano, agod sapita ibinawo dam ubol idu dop dulong a.” ²⁰Ago tag tamol an yaug, distrik a yanan TenTaun dubol dan ilon lo turen yabi on dugo, mel fidian Jesus in lo igane an tamolpein naod na ibol idu se ya. Ago dugo a fidian inanen ru dulong an durut saian geig a.

Pein bakan ta imat agod pein ta subam anda ya

Mat 9:18-26; Luk 8:40-56

²¹Aria, saen Jesus inanen megeloum adi dida tan an dibiseig, wog nam you aen ate afon diau a. Saen lon na disasau man, tamolpein wei mi dupalug dutumani dugo doup tubun ak Jesus dubuluwi a. Jesus in you sijiren na imado se ya. ²²Ago dugo ubou ab ta san titianek tamol adi luluad lo tamol ta yanan Jairus in Jesus san na yau a. In Jesus ile tag naon na turun isoluwi a. ²³Ilo mujanek ru lo isumianig igo ibol, “Inaineg nanug pein imat o da. On palu, bani in tinin fufo na ganep, afon uyan ilasa dop kumaen imado wa.” ²⁴An lo Jesus imasag in da diau a.

Diau on dugo tamolpein malan tubun an Jesus njen aban diri dugo Jesus dusupini se ya. ²⁵Aria, aben ante man pein ta tinin ilon lo subam anda, nek nal milaen mi dar tinin lo ilasa se, anajar 12 ago imado se ya. ²⁶Inanen moni samun fidian dokta tinid fo ikukule yau pasik, gug subam an ta digane itout na ya. Tia, subam an yau tubun dugo madai tubun geig ifuni yau on se ya. ²⁷⁻²⁸In imug mi ru Jesus ningen o lon dugo ilon igo isou, “Inai banig nek Jesus san kulos milaen ak nusupuri nile gup, tinig fon uyan ilasa wa.” Ago tag in tamolpein a Jesus diri an luad isag Jesus patun fo irig yaug san kulos bitijen te yabi ile ya. ²⁹Ago dugo saen nek an lo mi inanen dar tinin ilon lo yan igos a. Ago dugo in ilon lo sen ikubiani ak Jesus inanen subam igane itout a.

³⁰Ago dugo Jesus dam ilon lo sen ikubiani kisaek on ak dabai inanen tinin lo yan kuai te ilasa ya. Ago tag doup lulunad lo idansag isumianaig ibol, “Enti njasag kulos isupuri ak i?”

³¹Saen inanen megeloum adi ru en dulon man, awan diabig igo dubol, “On ule yak, tamolpein wei mi on dusupino futano da, ago bo man on ka ubol ‘Enti nai ibiag ak i?’”

³²Ak man Jesus naon idansa idanla dugo talpein enti mok ile wo malan yau se ya. ³³Agog pein an, mel e in o ilasa yen ilon on go Jesus san na ipalu ya. In irer dugo isuruwor se ya, ago dugo naon na turun isoluwig mel fidian ilasa yan kuai te irupe i a. ³⁴Agog Jesus igo ibol irupe i, “Nanug pein, onsigan e ilo rumok iginiog uyan lasa ya. On ka ilo maror lo wau a, agod onane subam itout yau geig a.”

³⁵Ago dugo Jesus ru an ibol yau on di imado dugo, tamol ta Jairus san ab lo yak ru diganeg Jairus san na yang ago dubol durupe i, “Onane nanu pein imat la ya. Gidad, girek manau aen ta utog na wa.”

³⁶Ak gug Jesus insad ru an patun ipanig, Jairus irupe i, “On urer umoi. Nek ilo lo rumok mi wa.”

³⁷Agog Jesus tamolpein fidian njen aban diri wan o imoi a, nek Pita, Jems agod in tein Jon, nunod utol anami in dida diau a. ³⁸Diaug, ubou ab gurman san ab ate dilasa dugo Jesus malan yang tamolpein tina n mugurun tubun kasik diganeg dumado dugo yil a. ³⁹Saen ab ilon lo iladu man, irupidaig ibol, “An ata wo tina n aru agane dugo lili n dam tubun geig agane dak i? Nanuk en ta imat na ya. Tia, in njon mi yabi da.”

⁴⁰Ago ibol man disel go kukok an digane ya.

Gug Jesus tamolpein fidian ab ilon lo yan ikudaig, patun fo dilasa diau dugo, nanuk an tinan taman, agod megeloum a in da dumado yan, injal go dida galun a nanuk yen dan lo diladu ya. ⁴¹Jesus pein bakan an banin te yabig, Arameik ru lo igo ibol, “Talita koum!” Ru an fun man “Pein bakan njurupaio da, masa!” ⁴²Ago ibol dugo gamu nam nanuk pein an imasag itor. In pein bakan, insan ana n 12 a. Aria, in kulob an dile man durut saian geig a. ⁴³Agog Jesus nanuk tinan taman an kudod yabig irupidai, “Ru mel en njen o tamolpein aenta ta arupidai na wa!” Agog nanuk an ana n dupanip yani wo irupidai a.

Profet ta yang an aman tia ya

Mat 13:53-58; Luk 4:16-30

6 ¹Aria, Jesus in megeloum adi dida panu an dubuseig insinan panu Nasaret na dumul diau a. ²Ubou nal idu dugo Jesus siganed ubou ab lo iladug tamolpein naod na Anut san ru ifulale pidinai se ya. Tamolpein wei mi insan ru dulon go durut saian a. Agog nug dusumiani ila iso dugo igo dubol se, “Aben dugon te mok tamol en mel en fidian inane yak i? Manau e in lo yen den dugon te inane yak i? Ale, kulob e banin

nam igane na yen man tubun geig a! ³Ak man tamol en talon uyanan a, en ab bek tamol amaiak i? En Maria san nanun a. Inanen tein muroun man Jems, Joses, Judas agod Saimon. Inanen lun muroun id lulunad lo dumado da.” An lo in Jesus saian dupani a.

⁴Gug Jesus igo ibol irupidai, “Profet ta tamolpein aenta sad malad lo yanjan aman tia yak ago ta itor na da. Tia geig a. Ak gug nek insinan panu lo, insinan muroun muroun lulunad lo, agod insinan ab lo dam, atna mi in yanjan aman tia ya.” ⁵Man ninen o Jesus ante kulob dabai anda yak ta igane san ta idaisuda na ya. Nek talpein kisaek kisaek subam amad da yak tinid fo banin iganeg ikubuniai a. ⁶Ago dugo in tamolpein ilo rumok amad tia yan ninen o irut saian geig a.

Jesus megeloum 12 idinaig panu panu diau a

Mat 10:5-15; Luk 9:1-6

Agog Jesus insiganen panu ibiseig gidigidad yang panu panu itor dugo tamolpein ipiterjanai se ya. ⁷Agog Jesus inanen megeloum 12 insan na dupalu wo igiai a. Dususag Jesus tamol adi emaiak in wagen lo ur saiak adi tamolpein tinidi ilon lo yak dukudaip diau san dabai ipidinai a. Agog itarpasaig fun iganeg uraru uraru mi idinaig diau a.

⁸In gamugo diau dugo kududod yabig irupidaig in gidad turen yabek san bioun ta disini na wa, nek makud mi a. Ak man latamad tia, badam tia, moni insad let lo dam tia, ago turen diabi wa. ⁹In ka sendal njed fo didiri wa, ak man yamel taidam titired lo didiri san geg ipidinai a. ¹⁰Agog in ibol irupidai, “An aben dugon te ab ta lo aladu wan, ate mi ab an san tamolpein dida amado yau nap panu an abisei wa. ¹¹Agod panu ta ate ta dihilian uyan dop ansam ru dam dulon o dumoi tap, saen abisawai o dop, njiemi apiltip san gufap panu an ate idu dop dile wa. An man kob ta murnap inaned ilo rumok tia yak san naon in mok dihan wak igo ya.”

¹²Ru an ibol itout dugo megeloum adi nuod uraru urarum dufufurak go diau a. In panu panu ate tamolpein igo durupidai se ya. “An ananem saian an fidian patum apanip ilom ibilisa wa.” ¹³Agod in ur sisaik tamolpein tinid lo yan wei mi dukudaig diau se ya. Ago dugo guren kitek nam tamolpein wei mi subam amad da yan tinid fo dububunig lo dukubuniai a.

Herod in Jon suguek san ifuni imat a

Mat 14:1-12; Luk 9:7-9

¹⁴Kin Herod in melmel e Jesus san megeloum adi digane se yan ninen o ilon a. Man dugo, nal an lo man Jesus san yanak tamolpein malad lo tubun geig ilasa la ya. Ta dubol, “Suguek san Jon in tamolpein dumat la yak lulunad lo fon imasag kumaen imado da, nek fun amaiak ninen o dabai funfun en tinin ilon lo urat digane da.” ¹⁵Gug aenta dubol, “En

man Elaija.” Agod aenkadi dubol, “Inj man profet ta mi a, nek ibol profet adi wagam san igo mi a.”

¹⁶Ak man saen Herod inj Jesus ata kulob igane idu se yan san ru ilonj man igo ibol, “Jon man bo buron njartig imat la yak gug fon kumaen imasa da ya.”

¹⁷Inj ago ibol a, man dugo, imug mi inj yu tamol adi idinaig Jon diabi wo diau a. Njen banin dusubanig subanek ab lo digane ya. Man ata wo? Herod injanen tein Filip san iwon, yanjan Herodias, ilo uyan ipani san nijen o inj Jon subanek ab lo igane ya. Imug mi Herod pein en injsan tein banin na injaneg inj da nug dijane ya. ¹⁸Gug Jon inj Herod ru en irupei, “Onsigane tei san iwon da ator tap, onj kubiaen ta uri pani na da.” ¹⁹Amaiak nijen o Herodias tinjaen saian go Jon lo siai iganeg imado na ya. Inj Jon ifuni imat o ilon tubun mi yen a, ak gug injsen mi ago igane san ida ta isuda na ya. ²⁰Man dugo, Herod Jon nijen o tubun mi irer se ya. Inj ilonj ak Jon inj tamol itaot di gun a, an nijen o talpein ta Jon muruan ipani san nijen o iparfutani fufei na ya. Nal wei mi inj Jon da dijinej go Herod ilo uyan lo injanen ru ilonj se ya. Ak gug ilon weiwei dugo ru fun ilonj uyan san tia ya.

²¹Nal ta idu man dal ta Herodias idinaip Jon dufuni imat san an ilasa ya. Nal a Herod san tinan gubak mi igansi an san saen ilasa ya, an lo Herod soubul igane ya. Inj ru iganeg injanen gabman gurman adi, yu tamol unbiek adi, agod tamol adi malan te yak Galili distrik lo yan, fidian dupalup ananj diani wa. ²²Aria, ananj diani dugo Herodias nanun pein iladug naod na isuluwai se ya. Herod injanen turan dida dile dugo malad bulbal dugo ilod tubun mi uyan a. Man nijen o kinj Herod nanuk pein an irupei, “Onj mel dugon nijen o ilo ibol tap, onj ka sumianag dop naj nupano wa.” ²³Agog ru lak na geig nam injanen ru dabai ipanig ibol, “Onj ata mel nijen o sumianag, gidad naisag kagin panek aben njibitip wadan nupano san sumianag a, naj ka nupano mok a.”

²⁴Agog pein baras an yaug, tinan isumiani, “Njai ata mel ipanag o njusumiani wak i?”

Agog tinan awan yabig ibol, “Suguek san Jon san kabunan.”

²⁵Agog pein baras an ririan yaug kinj san na ilasag irupeig ibol, “Njai ilog man onj gamu nam ru ganep suguek san Jon injsan kabunan daeg fo diganep disini dupalup dupanag a.”

²⁶Herod ru an ilonj go ilon muruan tubun mok a. Ak man ru lak na geig an gubak mi ibol ilasa la ya, agod injanen turan adi malad lo injsan awak aban ipani an nijen o dam, awan ibilisa wo ilon ta yen na ya. ²⁷Ago tag inj ririan yu tamol ta talpein ifuni imat san an idinig yaup suguek san Jon buron itartip isini ipalu wo ibol a. An lo yu tamol an yaug, subanek ab ilon lo Jon buron itartig, ²⁸kabunan daeg lo iganeg isini ipalug pein baras an ipani a. Agog inj isini yaug tinan Herodias ipani a. ²⁹Saen Jon san

megeloum adi mel en duloŋ man, dupalug tubabun diŋaneg disini diaug mutou lo digane ya.

Jesus tamol 5,000 ifutuwai a

Mat 14:13-21; Luk 9:10-17; Jon 6:1-14

³⁰Aria, saen Jesus san megeloum adi tureŋ diabig itout go dumul diaug Jesus dida dutumanig kulob funfun digane, agod piteŋanek a tamolpein durupidai an da, naon na dubol idu ya. ³¹Ago dugo nal an lo man tamolpein wei geig Jesus megeloum adi dida sad na diau dumul oŋ dugo iŋ dunuai anen tia ya. Man niŋen o Jesus iŋ megeloum adi irupidai, “Id tumasap, aben ta tamolpein an tia yak ate taup, idsed kisaek dop kitek yaes tabal a.”

³²Ago ibol tag wog lo disidag, aben ta yoitout tamolpein an tia yak ate yaes dubal o diau a. ³³Ak man tamolpein panu fidian lo yan malad yaug dil duloŋ, ago yan lo wei mi dumasag ŋied nam dumaspalu oŋ you dulubanig, dumug diau silatik oŋ go, loŋ a Jesus iŋanen megeloum adi dida disasau wo yan ate dilasa ya. ³⁴Saen Jesus wog ibiseig loŋ na idu man, doup malan tubun an afon yil a. Agog iŋ ilon imuŋanai a, man ata wo, tamolpein an nek ibol sipsip titianek tamol amad tia yak igo woŋ a. Ago tag imasig imado dugo mel wei mi ipiteŋanai se ya.

³⁵Ru duloŋ dugo yaug gurai isi dugo, iŋsan megeloum adi san na dupalug ago dubol, “Aben en yoitout a, ad dam idu yau la ya. ³⁶Man niŋen o tamolpein en dinaip dufurak pe gidigidad diaup aben siŋired na yan san panu te anaŋ didad pe diani.”

³⁷Ak man Jesus awad yabig igo ibol, “Aŋ mel ta apidinaip diani.”

Agog iŋ dubol, “Maŋ tamolpein ago yak bret madad pe mufutai san ta idaisuda na ya. Maŋ fidian kalam 8 urat miganep^c moni idaisuda miŋane gup, bret idaisuda mi madad a.”

³⁸Agog Jesus isumianai, “Aŋ bret sapita da yak i? Aup ale.”

Agog diaug dileg dumul dupalug durupe, “Kafen, agod iy uraru a.”

³⁹Agog Jesus tamolpein an irupidai, “Aŋ sem ibitaŋ pe warou wei mi alasap gafurfur fo amasip amado.” ⁴⁰Ago tag iŋ sed ibitaig doup kitek wei mi dilasa, aenta talpein 50, aenta 100, ago dumasig dumado se ya. ⁴¹Agog Jesus bret kafen agod iy uraru an iŋaneg, kumaen panu baŋen lo malan yabisag, ilo uyan ru Anut ipanig bret an yafute idug megeloum adi ipidinai a. Agog iŋanen megeloum diŋaneg tamolpein duwae pidinai a. Nek ago mi iy uraru an igile kititik go megeloum ipidinaig diaug tamolpein dupidinai a. ⁴²Ago dugo iŋ fidian mi bret an diani dugo fidian luad ipuk. ⁴³Aria, dunuai itout gug, megeloum adi dumasag, anaŋ wadan ta diani na yan dutumanig, sareg 12 anua. ⁴⁴Tamol a dunuai an dusutai man 5,000 a.

^c Grik sad moni lo man, 200 denari.

Jesus in you aten fo itor a
Mat 14:22-33; Jon 6:15-21

⁴⁵Aria, saen anan dianig itout man, Jesus inanen megeloum adi gugurut ipidinaig, in wog lo disidap you aen ate panu yan an Betsaida na dumug diau wo irupidai a. Ago dugo in sen man imadop, tamolpein an fidian idiraip dufurak in siganed na dumul diau wo, ago irupidai a. ⁴⁶Saen tamolpein idinaig diau pasik man, in sen mi did fo Taman san na igudani wo isuda ya. ⁴⁷Saen tidom idu man, wog an mayau na iyawai se ya, ago dugo Jesus in tan na sen kisaek imado ya. ⁴⁸In malan yang megeloum adi maeg diganeg dufulani dugo yaes ifu dugo yil a. Man dugo, tim tubun ifure dugo naod yabi se ya. Saen salso idu man, in you aten fufo sad na yau a. In irinanai o ilon yen manon a. ⁴⁹Ak man saen inanen megeloum adi Jesus you aten fufo itor dugo dile man, in tamol ntun ta dile ago dubol dugo disasai a. ⁵⁰Man dugo, in fidian Jesus ago dile an lo tubun mi direr dugo dusuruwor se ya. Ak man Jesus irupidaig ibol, “Dabai anane, en naiseg, arer amoi!” ⁵¹Agog yang wog fo isudag dida dumado dugo tim ifure yan itout a. Megeloum adi ago dileg durut saian dugo ilod weiwei geig a. ⁵²Ata wo? Jesus enti mok an dulon uyanan an nigen o ilod itau a, in bret lo kulob igane an dile yak gug kulob an kankan Jesus nigen o ta ipidinai uyan na ya.

Jesus Genesaret na subam adi wei mi ikubuniaia a
Mat 14:34-36

⁵³Aria, saen Jesus megeloum adi dida you aen ate dupalu man, tan titin yan an Genesaret dubol dan ate lon na disasau a. ⁵⁴In wog lo dudu dugo aben an san tamolpein malad yang ririan Jesus dile dulon a. ⁵⁵An nigen o dumasag dumaspalu on gidigheid diau dugo ru duwae se ya. Agog tamolpein wei mi in talpein subam amad da yak kapal fo dien dan dusug aben dugon te Jesus imado den ate din al diau se ya. ⁵⁶Ago dugo aben dugon te Jesus yang ilasa yan, taun tubun ak boi, tia panu tubun ak boi, tia, kititik ak boi, ate in subam adi kapal fo dusug didaen aben lo didiraisig dien se ya. An lo Jesus sumeik isusa dop dusumianip inanen yamel bitijen mi ka diabi dile wa. Agog talpein a diabi dile yan fidian mi, Jesus ikubuniaig uyad isusa ya.

Mel ikokan, agod ta ikok na ya
Mat 15:1-9

7 ¹Aria, saen Farisi adi, kubiaen san girek manau aenta dida Jerusalem na dupalu man, Jesus dulubanig, ²Jesus san megeloum aenta, banid nun anda yak dida anan diani se yan dil a. Inaned tamol kagin igo ibol, in banid dufulanip ikok ilasa gup anan ka diani wa.

³(Man dugo, ijaned kagin igo ya. Farisi adi, agod Juda adi fidian mi dam, iŋ imug mi banid dufulani gup anan diani wa. Iŋ ta dufulani na tap, iŋ dida anan ta diani na wa. Dal an lo iŋ tubud baged sad tamol kagin diri dupani na yan ago mi iŋ dam duri da. ⁴Agod saen didaen aben dibiseip siganed ab lo diau duman, iŋ anan ta diani na wa, tia, iŋ dusug pe tinid ikok gup anan diani wa. Tamol kagin aenta wei kasik dam iŋ kagin dupani da. Nek ibol gab fulanek, bod daeg fulanek, agod mel san kapen sensen bras nam digane yan, mel igo yan fidian niŋedi wo tamol kagin yen da.)

⁵Aria, Farisi adi iŋ kubiaen san girek manau adi dida awad dutumanig Jesus dusumiani, “En ata wo onane megeloum adi iŋ tubud baged sad tamol kagin iri panim ago ta dutor dumado na dak i? Ijaned banid ikok tia yak ate anan diani da.”

⁶Agod tag Jesus irupidaig ibol, “Aisaia iŋ profet ru itaot mok an balek uraru adi niŋemi wo ibol ilasa ya. Girek igire yan igo ya,

‘Tamolpein en awadi nam yanag diabisa da,
ak man bubedi man asau geig nai lo yen da.

⁷Iŋ sen kawan nai ubou ag dile da,

man dugo, pitejanek a tamolpein durupidai dan man nek tamol iŋsiganed ilo sou mi a.’

⁸Ru kubiaen Anut gubak mi ipanan an, absukali dugo tamol kagin an mi abi dabai da.”

⁹Agog iŋ fon irupidaig igo ibol, “An lulunam lo kagin igo yak yen da. An ru kubiaen Anut ibol an gigin na agansi, an lo anŋiganem tamol kagin ari apani da. Agod an ilom lo kagin en uyanan geig ago abol da! ¹⁰Gubak mi Moses igo ibol, ‘Onane tina tama awad paen na mado dop kagin pidinai o uyanan a.’ Agod, ‘Ta iŋ awan nam tinan taman imisilanai tap man, dufuni imat a.’ ¹¹Ak man an abol, ‘Tamol ta taman boi, tinan boi, igo irupe, mel ta ate nai ka nŋibinawo san niŋen o man Korban’ (ru an fun man, Anut mel an nŋien nŋupani la ya), ‘an niŋen o man, o kabel, nai mel an nŋupanen san tia ya.’ ¹²An lo tamol an fon binawek ta tinan taman niŋedi wo igane pidinai san an ta alefuni na wa. ¹³Dal emaiak lo, ananem tamol kagin tamolpein duri dupani wo abol den lo mi, an aganeg Anut san ru an nuŋon tia ya. Agod mel wei mi taidam naok nek ago yak agane da.”

Jesus ata mel tamol ilon lo nun ipani wan niŋen o ibol ilasa ya

Mat 15:10-20

¹⁴Agog Jesus iŋ fon tamolpein fidian siŋiren na dupalu wo igiai a. Dupalug, ru ago ibol irupidai, “An fidian kududom agurep, ru en nabol dop, alon fufei wa. ¹⁵⁻¹⁶Tamol ta mel kuai tep tiŋaen lo yau dan nun ta ipani na da. Tia, mel tiŋaen lop awan lo ilasa damaiak tamol ilon nun ipani da.”

¹⁷Jesus tamolpein tumanek an ibisawaig ab lo iladu man, ijanen megeloum adi ru fajan en niĵen o dushmani a. ¹⁸Agog iĵ isumianaig ibol, “Ak dugo, aĵ dam an alon san tia i? Aĵ ta ale na yak, mel ta tamol tinin kuai fo yak, tamol ilon yaup iganep nun ilasa san tia yan alon ak i? ¹⁹Man dugo, mel an buben lo ta yau na ya, tia, tiĵaen lo yaug dubei san dal irig ilasag itout yau a.” (Jesus ru emaiak ibol an lo anan fidian nuaen san uyan ak ago ibol a.)

²⁰Agog ibol on, “Mel a tamol ilon lo yen dugo kuai te dilasad amaiak tamol ilon nun ipani da. ²¹Man ata wo? Mel naok naok emaiak tamol ilon lo dien den, iĵ buben mok ilon lo yak kuai te dilasa da, kankan saiak, jeit kagin, gumagam kagin, tamol ifuni imat dak, turan iwon ida dien dak, ²²mala sek kagin, nun kagin, siai kagin, uf ru, se pitianoĵ kagin, agod burau kagin. ²³Mel saiadi emaiak fidian talpein ilon lo yak kuai te dilasa da, nek mel amaiak mi talpein an ilon nun ipani da.”

Gob pein ta san ilo rumok

Mat 15:21-28

²⁴Ago gug Jesus imasag, aben an ibiseig, gob adi sad taun tubun ak uraru, Tair Saidon da sad lubanek lo yaug, ab ta lo isidag, ante kitekan yaes ibal a, ate tamolpein ta san turen dulon man imoi a. Ago bo man iĵ mianuk lo imado san tia ya. ²⁵Pein ta ijanen nanun pein ur saiak anda yak iĵ ru tim Jesus ante imado dan ilon a. Ririan imasag Jesus san na ipalug, naon na turun isoluwi a. ²⁶Pein en man Grik, agod distrik tubun ate imado dan Siria provins, agod titin ta dugon te tinan igansi an aben ta lon siĵiren na yaĵan Fonesia dubol da. Aria, Jesus naon na turun isoluwig, Jesus iĵ nanun pein tinin lo ur saiak ikudip yau wo ilo muĵanek ru lo isumiani a.

²⁷Iĵ pein an irupeĵ, “Umoi dop, nanuk ata diani wo dumat dan malmalan diani wa. Maĵ nanuk adi sad anan miĵanep goun adi diani wo sad na mabal tap, an ta uyan na wa.”

²⁸Ak man pein an awan yabig igo ibol, “Awo, tamol Tubun en ubol mok da. Gug goun dam badim paen na dumado dop, nanuk sad awad aban idu man ka diani wa.”

²⁹Ago tag Jesus ibol, “Ru en rupaĵag ak niĵen o ka wau a. Ur saian an onane nanu pein tinin lo yak ibiseig yau la ya.”

³⁰Agog iĵ sinan ab lo yaug nanun pein gadab fo yen dugo ile, agod ur saiak dam ibiseig yau a.

Jesus tamol ta kududon awan da itau ak ikubune ya

³¹Aria, Jesus fon imasag, Tair lubanek ibiseig, isidag yaug, taun tubun ak yaĵan Saidon ante ilasa ya. Agog aben an ibiseig, imul idug yaug “TenTaun”^d lubanek lo ilasag, You Galili siĵiren na isusa ya. ³²Ante man

^d Dekapolis

tamol ta kududon ipakuk agod balen muruan ak dijaneg Jesus san na dupalug, banin tamol an tinin fo igane wo dusumiani a.

³³Agog Jesus tamol an ijaneg, ida tamolpein malan tubun an dibisawaig gigin na nuḡod uraru diau a. Ante gug Jesus inḡsen banin kikoun tamol an kududon anenaim lo isousoug sen banin fo ilusug, ate tamol an balen yabi ile ya. ³⁴Agog Jesus naon yabisag malan lak na isida dugo yaes yabituani gug tamol an irupei, “Efata.” (Ru an fun man: upuk.) ³⁵Ago ibol go tamol an kududon uyan ilasag balen dam pasauman go ru ilonḡ go inḡnerḡ uyanan se ya.

³⁶Jesus ru dabai anda nam mel a dile yan tamolpein aenta ta durupidai na wo ibol. Ak man urat wei kasik igane yan lo urat an san ru dam tubun mi diḡnerḡ ila iso se ya. ³⁷Ru an dulonḡ go durut saian geig a. Inḡ igo dubol, “Tamol en mel fidian igane man uyanan geig ak mi a. Inḡ ijaneg tamol ta kududon ipakuk an ru ilonḡ ak, agod tamol ta awan itau an ru ibol a.”

Jesus tamolpein 4,000 ifutuwai a

Mat 15:32-39

8 ¹Saen an lo tamolpein malan tubun mok fon Jesus san na dutumani a. Dumado dugo ijaned ananḡ latamad diani pasik a. Ago tag, Jesus ijanen megeloum adi dupalu wo igiai a. Agog dupalug dilasa dugo Jesus irupidai, ²“Inḡai tumanek tubun en ilog imunanai da, man dugo, gamu nal utol yau la dugo inḡ nḡai da mumado na ya, ak gug ananḡ ta diani san etna tia ya. ³Inḡai inḡ nḡdinaip dimatigen onḡ inḡsiganed na diau tap, dal na rei ifu dop malad itilani wa. Agod aenta dal asau geig dupalu ya.”

⁴Ijanen megeloum adi awan diabig dubol, “Aben yoitout en lo tamol ta, ka dugot na bret idaisuda ijanep lo tamolpein en ifutai ak i?”

⁵Agog Jesus isumianai, “Anḡ ananḡ bret sapita yen di?”

Agog dubol, “Bret seven mi a.”

⁶Agog Jesus tamolpein an tan na dumas wo irupidai a. Agog inḡ bret seven an ijaneg, Anut ilo uyan ru ipanig, yafututeg, megeloum adi tamolpein duwae pidinai o ipidinai a. Agog diaug bret duwae ya. ⁷Iy kititik kadi inḡ dida dien a. An lo Jesus iy an ijaneg, Anut ilo uyan ru ipanig, megeloum adi irupidaig iy en dam tamolpein duwae pidinai o diau a. ⁸Aria, tamolpein ananḡ an dianig idaisuda geig a. Diani itout gug megeloum adi dumasag ananḡ samsamun dutumanig sareg seven lo ditaneg awad isa ya. ⁹Inḡ tamol adi a dumado yan dusutai man 4,000 igo ya. Agog didinaig dumul diau a. ¹⁰Agog Jesus megeloum adi dida wog lo disidag, Dalmanuta distrik ante diau a.

Jesus kulob girager ta igane wo dusumiani a

Mat 16:1-4

¹¹Ante man Farisi adi dupalug Jesus dusumiani wo fun digane ya. Inḡ ilod man Jesus bitinaek lo digane wo ago yen se ya. Amaiak ninḡen o inḡ kulob kumaen

panu san ta kob igo wonj igane dop dile wo dusumiani a. ¹²Jesus injsad ru an ilonj go injsen njutun ilon lo yaes yabitanig igo ibol, “Ata wo anj tamolpein gamu e amado den kulob girager ta kob igo wonj njigane dop ale wo ilom yen dak i? Njai ru rumok jurupaianj da, kob naok igo yan njai ta njupananj na wa.” ¹³Agog inj ibisawaig, megeloum adi dida fon wog lo disidag, diaug, tan aen ate dilasa ya.

Farisi adi inj Herod da sad yis

Mat 16:5-12

¹⁴Aria, megeloum adi ilod injaonj go bret ta disini na ya, wog lo man bret kisaek o lian yen a. ¹⁵Jesus ru kagin ipidinaig ibol, “Kagin agane, Farisi sad yis, agod Herod san dam ninjen o kagin agane uyanan a.”

¹⁶Megeloum adi ru an dulonj go injsed mi ru an san fun mok kuai dupani wo nug lo dinijenj ila iso se ya. Agog dubol, “Inj ago ibol man fun, manj bret amama tia ya.”

¹⁷Jesus megeloum adi dugo dubol se man ilonj, ago tag isumianai, “Ata wo anj bret amam tia yak ninjen o nug lo akubiai dak i? Ak dugo, anj nen ta ale alonj na yak i? Ak dugo, anj kankan amam tia i? ¹⁸Anj malam da ya, ak gug anj ta ale geig na da. Nek ago anj kududom da ya, ak gug anj ta alonj geig na da. Mel en ilom injaonj ak i? ¹⁹Saen njai bret kafenda njafututeg tamol 5,000 njufutuwai an, anj sareg sapita lo ananj samukan atane yak i?”

Inj awan diabig dubol, “Sareg 12.”

²⁰“Agod saen njai bret seven njafututeg tamol 4,000 njufutuwai an, anj sareg sapita lo ananj samukan atane yak i?”

Agog dubol, “Seven.”

²¹Agog inj ibol, “Anj gamugo alonj uyan dak i?”

Jesus Betsaida na tamol malan itau ak ikubune ya

²²Jesus inj megeloum adi dida panu yanan Betsaida ante diaug dilasa ya. Ante tamolpein ta inj tamol ta malan itau ak dinjaneg dida Jesus san na dupalu ya. Inj Jesus banin nam tamol an tinin yabi ile wo dugudani a. ²³Agog Jesus inj tamol an banin te yabig, ida panu an dibisei a. Agog Jesus tamol an malan fo ilusug banin tamol an tinin fo iganeg isumiani, “Onj gamu abanj ka ule dak i?”

²⁴Agog tamol an malan yabisag ibol, “Awo, njai tamol njail da, ak man malag lo ai ditiliani dak igo mi a.”

²⁵Agog Jesus afon banin malan fo igane ya. An lo tamol an malan tubun mi ipuk go uyan isusag mel fidian ile fufei a. ²⁶Agog Jesus tamol an sinan ab lo yau o idinig irupej, “Onj itaot sigane ab lo wau, panu lo ta ladu na wa.”

Jesus inj Kristus an, Pita kuai te ibol a

Mat 16:13-20; Luk 9:18-21

²⁷Agog Jesus injsan megeloum adi dida panu an dibiseig dal dinjaneg panu kititik taun Sisaria Filipai lubanek lo dien dan ate diau a. Dal te

tureŋ diabi dugo iŋsan megeloum isumianai, “Tamol adi iŋ ŋai enti mok ago dubol di?”

²⁸Agog iŋ durupeï, “Aenkadi oŋ Suguek san Jon ago dubol dak, aenta oŋ Elaija dubol dak, aenta oŋ profet ta ago dubol da.”

²⁹Iŋ isumianai, “Ak man aŋsem ŋai enti mok ago abol di?”

Pita awan yabig ibol, “Oŋ Kristus.” ³⁰Agog Jesus ru kagin ipidinaig ibol, “Ŋai enti, aenta ta arupidaip duloŋ na wa.”

Jesus imat san nal sumeik ak ago irupidai a

Mat 16:21-23; Luk 9:22

³¹Saen an lo Jesus fun iganeg iŋanen megeloum adi ipiteŋanai man, Tamol Nanun iŋ madai wei mi ifuni wa, agod ubou san matu adi, pris gurman adi, agod kubiaen san girek maŋau adi iŋ fidian Tamol Nanun patud dupani wa. Ago dop iŋ dufuni imat a. Ak gug nal utol gup iŋ fon imasap kumaen imado da wa. ³²Jesus ru an kuai te ibol irupidai a. Ago tag Pita iŋaneg ida gigin na diaug ru dabai nam Jesus ipei a.

³³Ak gug Jesus idaŋsag Pita patun ipani dugo naon megeloum aenta ipidinai dugo Pita ipei ibol, “Satan, oŋ patug fo lasa wau! Man dugo, oŋ Anut san ilo girek ta uri pani na da, tia, oŋ tamol adi sad ilo girek an mi uri pani da.”

Idsiganed aigim tisinip Jesus ŋien aban tiri wa

Mat 16:24-28; Luk 9:23-27

³⁴Agog Jesus tamolpein igiaig, iŋsan megeloum adi dam kisaek mi dutumanig, igo ibol irupidai, “Talpein ta ŋai ŋieg aban iri wo ilon ibol duman, iŋ gidad sen yabi idup iŋsinan aigim isinip ŋieg aban iri wa. ³⁵Man ata wo? Ta iŋsinan madok iganep uyan ilasa wo ilon ibol tap, iŋsinan madok mok an ideg yau a. Ak man ta iŋsinan madok ŋai niŋeg o, agod bilaluŋ uyanan ak niŋen o ibisei tap, iŋanen madok mok patun ipasi dop yen yau a. ³⁶Man dugo, talpein ta tan en san filian fidian mi iŋane dop, iŋanen naon man iŋsinan madok mok malan isue tap, en dugo woŋ pe uyan ak i? ³⁷Ak dugo, iŋ ata mel tan en san, iŋanen madok nuŋon ak iŋane imul san ka ipani wak i? Mel ta igo yak yen man tia geig a. ³⁸Tamolpein ensauta gamu dumado den aupasek agod kagin sisaiak san saen lo dumado da. Talpein ta saen en lo ŋaisag ru niŋen o miai ifuni tap, saen ŋaineg eŋel gun agod Tamag san girager da ŋupalu dop, ŋai nek ago mi talpein an niŋen o miai ifunag a.”

9 ¹Agog iŋ ru ibateg igo ibol irupidai, “Rumok ŋurupaian da, aenta ebo dutur den gamugo dumat dop, Anut san kagin panek an dabai aman da ipalu dop dile wa.”

Jesus tinin ibilisag ilalaŋ a

Mat 17:1-13; Luk 9:28-36

²Aria, nal 6 yau la gug Jesus iŋ megeloum utol, Pita, Jems iŋ tein Jon ago iŋal go dida did tubun ak ta ate disida diaug sed dumado se ya. Ante dumado dugo Jesus iŋ malad lo tinin ibilisag ilalaŋ idu dugo dile ya. ³Ago dugo iŋanen yamel isapudadeg milkouk nuŋon geig ilasa ya. Milkouk an talpein ta tan en lo yamel marasin nam ifulanip ago ilasa san tia yak ago ya. ⁴Ago dugo malad lo dam Moses iŋ Elaija da dilasag, Jesus dida dutur go diŋiŋeŋ se yan megeloum dil a.

⁵Agog Pita Jesus irupeig ibol, “Girek maŋau, nek uyanan geig maŋ dam e mumado da! Oŋ ubol tap, lalai utol ente mabi wa, oŋane kisaek, Moses anen kisaek, agod Elaija anen kisaek dam mususe wa.” ⁶(Iŋ fidian tubun mi direr dugo dusuruwor se yan lo, Pita ru dugo ibol an ta ilon uyan na ya.)

⁷Agog timtaen^e ta idug yafutanai dugo awak ta timtaen an ilon lo ilasag ago ibol, “En man ŋaineg Nanug, ŋai bubeg mok a. Awan aloŋ!”

⁸Ago dulonŋ dugo malad yau imul silatik oŋ dugo abaŋ dile itililani se yak gug tamol aenta ta dil na ya, nek Jesus mi sen kisaek siŋired na itur se ya.

⁹Saen Jesus megeloum dida did an dibiseig dumul dudu dugo, Jesus ru dabai anda ipidinai a. “Aŋ aup mel e ale yan niŋen o tamolpein aenta ta arupidai na wa. Amoi dop Tamol Nanun imat pe mutou lo fon imasap kumaen imado dop, saen an lo mel e ale yen ka abol ilasa wa.” ¹⁰Ago tag iŋ ru mel en niŋen o iŋanen ilo girek lo dutueg yen a, ak man iŋsed nug lo diŋiŋeŋ se ya. Iŋ nug lo dusumiaenŋ ila iso, “Ru e mutou lo fon imasa wo ibol en fun mok dugo yak i?”

¹¹Agog iŋ Jesus dusumianig igo dubol, “En ata wo kubiaenŋ san girek maŋau adi iŋ Elaija imug ipalu gup ak ago dubol di?”

¹²Jesus awad yabig ibol, “En man ru rumok a, Elaija imug ipalup, mel fidian ikubuniaip imug dien ago mi dilasa wa. Ak man ata wo ru en digire yak i? Tamol Nanun tubun mi madai isini dop patud dupani wa.

¹³Ak gug ŋai ŋurupaiaŋ da, Elaija ipalu la ya. Ago dugo iŋsiganed ilobol lo saian dupani se ya, nek ibol girek ta iŋ niŋen o ibol ak ago mi ilasa ya.”

Jesus pinein ta ur saiak aman da yak ikubune ya

Mat 17:14-21; Luk 9:37-43a

¹⁴Saen Jesus iŋ megeloum utol an dida dumul go megeloum aenta sad na dilasa man, tamolpein malan tubun ak dutumanig dumado dugo

^e Kakao

dil a. Ago dugo kubiaen san girek manau aenkadi megeloum adi dida ru lo nug diabi dugo dil a. ¹⁵Agog tamolpein fidian saen Jesus dile man durut saian go ririan dumaspalu on Jesus san na dupalug ilo uyan lo duyuanani. ¹⁶Agog Jesus tamolpein isumianai a, “An kubiaek dugomaiak nug lo anijen ila iso di?” ¹⁷Agog doup an lulunad lo tamol ta awan yabig igo ibol, “Girek manau, naineg nanug ur saiak anda yak onsa na nisini nupalu ya. Man dugo, ur saian en iganeg awan itau a. ¹⁸Aben tata lo itor dop, ur ifunip ibili idu dop, awan lo subalbal ilasap, luon igurmip tinin ikikaip ti ibol yen da. Man nijen o nai onsa megeloum adi ur saiak an dukudi wo nusumianai, ago bo man in digane san tia ya.”

¹⁹In ru naon irupidaig igo ibol, “An ilo rumok amam tia, nal sapta nai an da tumado wak i? Nal sapta muruan apanag dan nisinip yau ak i? Nanuk an igo anane apalu.” ²⁰In pinein an dinane dupalu ya. Saen ur saian in Jesus ile man, silei nam pinein an ifunig itarfunig ibili yau idug, tan na idududuruk dugo itububuluk yau imul dugo subalbal awan lo ilasa se ya.

²¹Jesus pinein an taman isumiani, “Nal sapita kagin an in tinin lo ilasa yak i?”

Taman awan yabig ibol, “Saen in nanuk tusan lo mi kagin en iganeg ipalu ya. ²²Nal wei mi ur saiak en ifunig daon ipani dop yai lo, agod you lo ibili idup ifuni imat o igane se ya. Isop on idaisudap mel ta in lo gane tap, ilo imunanama dop binawama.” ²³Agog Jesus taman irupe, “Ru e ‘Isop on idaisudap mel ta in lo gane tap’ ubol en ata wo ago ubol ak i? Talpein ilo rumok aman da man, in o mel fidian mi ka ilasa wa.”

²⁴Ago dugo taman ririan iwagin go ibol, “Nai ilog lo rumok. Nai binawag dop naisag ilog yau imul dan nai idu!”

²⁵Saen Jesus tamolpein wei tinan dumaspalu on dutumani se yan yil man, in ur saiak an ru sakar nam ipeig igo ibol, “On ur saiak awa tau san agod kududo itau san, nai ru kubiaen nupano da, biseip sen lasa, fon umul tinin ilon lo ta ladu na wa.”

²⁶Agog ur saiak an isasai saian dugo nanuk an tan fo itarfuni saian geig a, ago gug ibiseig yau a. Pinein an tan fo tubabun igo won yen, ago tag tamolpein wei mi dubol, “In imat mok a.” ²⁷Gug Jesus banin yabig irae dugo, pinein an imasag itur a.

²⁸Saen Jesus ab lo iladu man, megeloum adi dida sed kisaek dumado dugo Jesus dusumiani, “En ata wo man ur saiak mukudi san ta idaisuda na yak i?”

²⁹In ru naon irupidai, “Gudanek lo mi an ur saiak naok igo yak ka akudi wa.”

Jesus saen uraru in san maten nijen o megeloum irupidai a

Mat 17:22-23; Luk 9:43b-45

³⁰Aria, Jesus inanen megeloum adi dida aben an dibiseig, turen diabig diaug distrik Galili titinaem diau se. Saen ante diau man Jesus tamolpein

aenta duloŋ o man imoi a. ³¹Ata wo? Inanen megeloum adi ipiteŋanai se ya. Agog irupidai, “Tamol Nanun inanen ager adi sad banid lo digane wa. In dufuni imat, agop nal utol yau gup, afon imasa da wa.” ³²Ak man megeloum adi ru an san fun ta duloŋ uyan na ya. Taida mi, in Jesus dusumiani wo direr se ya.

Enti in talpein malan te ya

Mat 18:1-5; Luk 9:46-48

³³In Kaperniam na dilasa ya. Saen in ab ilon lo dumado dugo, Jesus isumianai, “Dal na ansem ata mel ninen o nug lo akubiai yau imul se yak i?” ³⁴Ak man in dutokubol dumado se ya. Man ata wo? In dal na diau dugo in sed lulunad lo enti in tubun geig ak ninen o dukubiai yau imul se ya.

³⁵Ago tag Jesus imasi dugo, megeloum 12 an dupalu wo igiai a. Saen naon na dupalu man irupidai, “Talpein ta in yan tubun ilasa wo ilon ibol tap, in gidad sen igane murna yau a, agod dam in gidad tamolpein fidian sad biabi nlanal ilasa wa.”

³⁶Agog in nanuk nanun ta inaneŋ, megeloum adi lulunad lo igunig itur a. Agog banin nam yabig ikubiaig igo irupidai, ³⁷“Talpein enti nanuk igo yak ta nai yanag lo inaneŋ iyunani tap, nai dam iniliag go iyunag da. Agod talpein enti nai iniliag duman, nai mi tia ya, tia, Enti nai idinag go nupalu yan dam inaneŋ iyunani da.”

Tamol ta id nined o ager ta imado na dan, id turad a

Luk 9:49-50

³⁸Jon Jesus irupeig ibol, “Girek manau, tamol ta in on yan ibol dugo ate ur sisaik ikudai se dugo mile ya. Ago tag man in kulob ago igane yau o mupadau a, man dugo, in id lo tia ya.”

³⁹Jesus irupeig, “An in abituani amoi. Man ata wo? Talpein enti nai yanag lo kulob dababai anda yak ta igane man, in ririan ru saian nai nined o ibol ilasa san tia ya. ⁴⁰Man dugo, talpein enti in id o ager ta imado na dan man id turad a. ⁴¹An lo nai nrupaian da, talpein enti in, an Kristus san ak ninen o you kitek gab lo iganeŋ aluk o ipanag dan, inanen naon ibisei san tia geig a.”

Mel ta tamolpein aupasek digane wo iduduwai san ru

Mat 18:6-9; Luk 17:1-2

⁴²“Agod talpein ta nanuk igo yak nai o ilon rumok dak ta inaneŋ aupasek lo idu tap, talpein an gidad kagin igane wa. Man dugo, pat tinan buron lo disisi idup beig lo dibal pe isarir yau man bo uyan mok a. Man ata wo, an tia tap, ai wadan nai in nupani wan irinani geig a. ⁴³⁻⁴⁴Ulon. On bani turan aupasek lo udu san inginio tap, tutep ubal yau! Ago dop on bani tia madok kumaen yen san

lo ladu wo tap, an ta saian na ya. Man dugo, kabelan bani uraru mi dijiliop Ades lo yai pempem ided dan lo dubulo wau banau. ⁴⁵⁻⁴⁶Agod on nje turan aupasek lo udu san iginio tap, tutep ubal yau! On gidad nje tia madok kumaen yen san lo ladu wo tap, an ta saian na ya. Man dugo, kabelan nje uraru mi dijiliop Ades lo dubulo wau banau. ⁴⁷Agod on mala turan iginio au upas tap, mala an bilanip biliau a. Mala kisaek ama da madok kumaen yen san lo ka ladu wa. Kabelan mala uraru mi dijiliop Ades san yai lo dubulo wau banau. ⁴⁸Aben ante man, 'insad kadum ta dumat na wa, agod yai imat san tia geig a.'

⁴⁹Nek ibol saen Anut yai digane pani man beig dam alta fufo digane yak igo won, Anut tamolpein fidian yai tinid fufo igane wa.

⁵⁰Beig man biabi uyanan anda ya. Ak gug beig san gigen itout tap, aria dugo won tamol ta san gigen an iganep beig on ilasa da wak i? Amaiak nijen o an nugnug lo beig amam da ya, agod nug lo maror amam da amado wa."

Nug nanek dututep itout san ru

Mat 19:1-12; Luk 16:18

10 ¹Go Jesus imasag, panu Kaperniam ibiseig, you Jordan ituteg, titin ta Judea distrik a you an aen ate yen dan lo yau a. Ante tamolpein wei mi fon insan na dutumani a. Agod Jesus in fon insinan kagin iri panim ipitenanai se ya.

²Agod dugo Farisi aenta dususag dusubani wo igo dusumiani, "Idaned kubiaen dugo ibol ak i? Mel ta nijen o tamol ta insan pein ka ibisei ak i?" ³In awad yabi, "Ru kubiaen dugomaiak Moses ipanai ak i?"

⁴In dubol, "Moses uyan ipani a, tamol ta iwon ikudi wo tap, nug banin diabi amaiak itute san girek ta igirep, iwon ipani gup ikudi yau a."

⁵Agog Jesus ru naon igo irupidai, "An bubem pat on an nijen o Moses ru kubiaen en igire panai a. ⁶Ak gug fun mok lo Anut man 'tamol in pein da idirai a. ⁷Fun an nijen o tamol in tinan taman ibisawaip iwon inanep nug dupini dupini wa, ⁸an lo dop uraru an kisaek mi dilasa wa.' Amaiak nijen o in uraru ago tia ya, in man kisaek a, man dugo Anut insen mi itumanai a. ⁹Ak nijen o kabelan melmel a Anut itumanai an tamol ta itute banau."

¹⁰Saen megeloum adi Jesus dida ab ilon lo dumado man, ru en nijen o Jesus dusumiani a. ¹¹In ru naon igo irupidai a, "Tamol ta iwon ikudi yau dop pein sen ak inane tap, iwon imug ak malan lo man tamol en pein foun an da jeit digane da. ¹²Agod pein dam iwon tamol ikudi yau dop tamol sen ta inane tap, pein en dam in jeit kagin igane da."

Jesus in nanuk inal a

Mat 19:13-15; Luk 18:15-17

¹³Nal tag tamolpein insiganed nanuk kititik diyal go Jesus san na dupalug an lo banin nam ibiai ile wa. Ak man inanen megeloum adi

dipidai se ya. ¹⁴Saen Jesus yil man tiñaen saian go igo irupidai, “Nanuk adi ñaisag na dupalu wo dop eilafu wa, akudai amoi. Man dugo, Anut san kagin panek aben man nanuk ago yak sadi a. ¹⁵Ñai rumok nuñon ñurupaianj da. Talpein enti nanuk igo wonj Anut san kagin panek inane tap, inj Anut san kagin panek aben ilon lo ka iladu wa. Ak gug inj nanuk onj ilasa wo imoi tap, iladu san tia geig a.” ¹⁶Agog inj nanuk adi injal go ilataig, banin kabunjad fo iganeg bar ipidinai a.

Pinein damag filian anda yak Jesus isumiani a

Mat 19:16-30; Luk 18:18-30

¹⁷Jesus tureñ yabi wo dugo, pinein damag ta imaspalu onj inñsan na ipalug naon na turun isoluwig isumiani, “Girek mañau onj uya mok a, ata kubol ñigane dop lo madok pempem yen yau san ka ñigane wak i?”

¹⁸Jesus ru naon ibol, “Onj ata wo ñai uyag ak ubol di? Anut sen kisaek mi uyan aman a. ¹⁹Onj Anut san kubiaen fidian ulonj pasi a: onj ta funi imat umoi, jeit kagin umoi, ugam umoi, supalek ru ubol umoi, talpein ta rawip lo san melmel unjal umoi, agod onj tina tama awad uri pani wa.”

²⁰Inj ibol, “Girek mañau, ñai nanuk log ipalug gamu en kubiaen an fidian ñiri ñupani na ya.”

²¹Jesus tamol an malan ti ibol ile dugo buben tubun mi ipani a. Ago dugo ru en irupe i, “Onj mel taida ninen o mi katuka mado da. Umul waup, melmel a onj da yan udad pe moni ñanep, tamolpein mel ad tia ak wae pidinai a. Ago dop kumaen panu lo filia senamo geig ilasap yen a. Ago gup palup ñieg aban uri wa.”

²²Tamol an ru an ilonj dugo ilon idug ilon ipapaog ibiseig yau a. Man dugo, inj tamol filian tubun anda ya.

²³Agog Jesus idañsag malan yang megeloum adi yil dugo irupidai, “Tamolpein ensauta a filian tubun amad da yan, Anut san kagin panek aben ilon lo diladu san muruan kasik a!”

²⁴Inanen megeloum adi ru an dulonj go durut saian a. Ak gug Jesus fon ibol, “O nanug muroug, talpein Anut san kagin panek aben lo isadu san man muruan geig a! ²⁵Tamol filian anda yak Anut san kagin panek aben lo ka iladu wak, an rumok tap, aria kamel ta si gubaran lo yau san man pasauman geig a.”

²⁶Ru an dulonj go nen durut saian a. Ago tag inñsed nug ilon lo dinñen se ya, “Mago tap, enti mok patu pasek ka inane wak i?”

²⁷Jesus malan ti ibol go yil dugo irupidai, “Tamolpein mel en digane san ta idaisuda na ya, ak gug Anut lo mel ago man ta muruan na ya, ata wo, inj lo mel fidian man pasauman a.”

²⁸Agog Pita ibol irupe i, “Ule mañ onj ñie aban muri wo mel fidian mibisei a!”

²⁹Agog Jesus igo ibol, “Ñai ru rumok ñurupaianj da, talpein enti ab ibiseig, tia tein boi, tia lun boi, tia taman boi, tia tinan boi, tia nanun

muroun boi, tia siganen tan boi, an ɲai ɲaɲag yabisa wo ibisei dop man, ³⁰tan en lo Anut naon uyanan geig ipani wa. Gidad talpein an malan lo melmel a ibisawai an siɲaokan geig, ɲananen naon san melmel man nal 100 iriɲani wa. An lo naon ago yak ɲane wa. An man ab, tein taon, lun, tinan, taman, nanuk adi, abi dam fidian foun ak wei di wei mok ɲane wa. Ago gug dida madai di muruan funfun dam ɲane wa. Agod murnap mel fidian foun dilasa san saen lo man, ɲɲ kumaen pempem mi yen san an dam ɲane wa. ³¹Ak man talpein wei mi gamu ɲɲ malan te dan nal an lo man talpein kawan ak ago dilasa wa. Agod talpein wei mi ɲɲ tamol kawan igo dumado dan nal an lo malan te dilasa wa.”

Jesus imat pe imasa da wak fon ipiteɲanai da

Mat 20:17-19; Luk 18:31-34

³²Aria, Jesus ɲananen megeloum adi dida Jerusalem dal diɲaneg, diau dugo Jesus imug yau se ya. ɲɲ ilon Jerusalem na diau wo ago yen an ɲɲen o megeloum adi durut saian geig a, agod tamolpein a ɲɲen aban diri dan ɲɲ dida Jerusalem na diau san ɲɲen o tubun mi direr se ya. Saen an lo Jesus fon ɲananen megeloum adi ɲɲal go gigin na diaug ɲɲ mel dugo ɲɲ lo ilasa wan ɲɲen o irupidai a. ³³ɲɲ ibol, “Alonɲ uyanan, id Jerusalem na tau da. Ante man Tamol Nanun diɲanep pris gurman adi agod kubiaenɲ san girek maɲau adi banid lo digane wa. ɲɲ imat san ru ago duguni wa. Ago dop Juda tia yak sad banid lo digane dop lo ³⁴kukok aman diganep, dusulanip, lubum nam dufunip murna gup dufuni imat a. Ago digane wak man nal utol gup fon imasa dap kumaen imado da wa.”

Jems ɲɲ Jon da sad sumiaenɲ

Mat 20:20-28

³⁵Agog Sebedi nanun uraru an, Jems ɲɲ Jon da, ɲɲ dususag Jesus dusumianig igo dubol, “Girek maɲau, maɲ iloma man, mel ɲɲen dugo musumiano wo dak ago ka gane panama wa.”

³⁶Ago tag Jesus isumianai, “Ata mel ɲai ɲɲigane panaɲ o ilom ibol di?”

³⁷Agog ɲɲ durupeɲ, “Ru gunip, onɲane girager san saen idu dop, maɲ onɲane badim fo onɲ sinjire na mumado wa, kisaek onɲ bani won ak lo dop, kisaek onɲ bani ɲas ak lo wa.”

³⁸Ak man Jesus awad yabig irupidai, “Ata mel ɲɲen o asumianag dan ɲɲen o aɲaonɲ da. Ak dugo, gab a lo ɲai ɲaluk amaiak lo aluk o aɲ idaisuda yak i? Tia, suguek a ɲai ituanag amaiak dam aɲ ituanag dop man, aɲ idaisuda yak i?”

³⁹ɲɲ ru naon durupeɲ, “Awo, maɲ idaisuda ya.”

Agog Jesus irupidai, “Rumok, gab a lo ɲai ɲaluk amaiak lo aɲ aluk a, agod suguek a ɲai ituanag amaiak dam aɲ ituanag a. ⁴⁰Ak man aɲ ɲai sinjireg na amado wa, ta banig won ak lo dop, ta banig ɲas ak lo,

aben uraru amaiak naiseg mi nupanaŋ san ta idaisuda na ya. Tia, naisag Tamag inŋen mi tamol ta aben an ipidinai san niŋen o ipilianai la ya, amaiak niŋen o aben uraru an inŋsadi mi a.”

⁴¹ Saen inŋanen megeloum 10 aenkadi mel an duloŋ man, Jems inŋ Jon da niŋedi wo tiŋaed saian a. ⁴² Ago tag Jesus megeloum igiaig inŋsan na dupalu ya. Dutumani dugo ibol, “Aŋ alonŋ ak gob adi lulunad lo tamol a inŋsed gurman dubol dan, sad dabai tamolpein a paed na dumado dan dukubiai pidinai da. Ago dugo inŋ lulunad lo tamol a yaŋad ad da yan diganep tamolpein kawan ak inŋaned tuod paen na dumado wa. ⁴³ Ak gug aŋ lulunam lo kagin ago yak ta ilasa na wa. Talpein ta aŋ lulunam lo inŋ yaŋan tubun ak inŋane wo ilon ibol tap, sen iganep aŋanem biabi nŋilaŋal oŋ ilasa wa. ⁴⁴ Agod talpein ta aŋ lulunam lo inŋ imug yau wo ilon ibol tap, sen igane idup aŋ fidian aŋanem bigabeg urat igane panaŋ san ilasa wa. ⁴⁵ Nek dal kisaek an lo Tamol Nanun inŋen mi, aenta inŋ o binawek urat dupani wo ta ipalu na ya, tia, aenta niŋedi wo binawek urat ipidinai o ipalu ya, agod dam sen ibiseip an lo tamolpein wei mi inŋal san niŋen o ipalu ya.”

Jesus Bartimeus malan yafute ya

Mat 20:29-34; Luk 18:35-43

⁴⁶ Aria, Jesus inŋ megeloum adi dida tureŋ diabig Jeriko na dilasa. Saen inŋ tamolpein malan tubun ak dida taun an dibisei man, tamol ta yaŋan Bartimeus (an man Timeus san nanun) dal giranŋen na imasig moni dupani wo iwagiŋ se ya. Inŋ man tamol malan itau a. ⁴⁷ Saen inŋ Jesus Nasaret san tamol dal ante ipalu dan ago ilonŋ man, awan tubun mi iwagiŋ go ibol, “Jesus, Dawid Nanun, ilo imuŋanag!”

⁴⁸ Tamolpein wei mi dububuŋanig, dubol, “Awa itaup tokubol mado!” Ak man inŋ nen tubun mi isasai, “Dawid Nanun, ilo imuŋanag!”

⁴⁹ Jesus yau oŋ dugo wagiŋ an ilonŋ tag, itur dugo tamolpein dubuluwi an irupidai, “Aŋ awagi.”

Ago tag inŋ tamol malan itau an duwagig dubol, “Ilo wabisap, masa, inŋ igio da.” ⁵⁰ Man niŋen o inŋ ririan san yamel madid san ak iragali ibal go imasag, Jesus san na ipalu ya.

⁵¹ Jesus isumiani, “Oŋ ata mel nŋai oŋ o nŋigane wo ilo ibol di?”

Agog mala itau tamol an ru naon irupeŋ, “Tubun en, nŋai abanŋ nŋile wo nŋamat da.”

⁵² Agog Jesus irupeig ibol, “Wau. Oŋane ilo rumok iginiog uya isusa ya.” Gamu nam malan uyan ilasag abanŋ ile kisaek oŋ a. Agog dal im Jesus nŋien aban irig yau a.

Jesus Kiŋ oŋ Jerusalem na iladu ya

Mat 21:1-11; Luk 19:28-40; Jon 12:12-19

11

¹ Jesus inŋsan megeloum dida Jerusalem sumeik dupanig, Did Oliv sinŋiren na panu uraru ta yaŋad Betfage inŋ Betani da dubol

dan ate disusa ya. Ago man Jesus ijanen megeloum uraru ta idinaig² irupidaig ibol, “Anj urarum panu o malad yaug tile dan ate au. Aup aladu dop donki foun ak ta dususeg imado dak ale wa. Donki an fufo talpein ta imasi man tia ya. Kam apasip anjanep niasag na apalu wa.³ Tamol ta irupaian, ‘Anj ata wo ago agane dak i?’ ago ibol tap, an igo arupe i wa, ‘Donki en Tubun ak ibunawi san urat aman da ya. Milaen tiap inj ririan fon iganep imul ipalu wa.’ ”

⁴Aria, megeloum uraru an diaug, donki foun ak ab san dalawan ate dususeg kuai te dal na itur dugo dile ya. Agog kam dusopasi a. ⁵Ago dugo tamol aenta sumeik dutur an igo dusumianai, “Ata wo an donki an kam apasi di?” ⁶Agog uraru an ru Jesus ibol ago mi durupidai a. Ago tag tamol an dilfu dugo donki dijaneg dida diau a. ⁷Diaug, Jesus san na dilasag, insad yamel milaen ak diragalig, donki patun fufo duruwari a. An itout go Jesus fufo imasig dida diau a. ⁸Agog tamolpein wei kasik insiganed yamel milae milae yak diragali dugo dal te na duruwari se ya. Ago dugo aenkadi garan lo ai raen dututeg dal te na bala didiri se ya. ⁹Tamolpein aenkadi, Jesus dida imug mi diau dugo, tamolpein aenta murna dupalu se ya, inj fidian mi igo dubol duwagin se na ya, “Hosana!

Tamol e Tubun ak yaan lo ipalu den, Anut san bar ijan ya!

¹⁰ Man tubuma bagema Dawid san kagin panek gamu ipalu dan, bar ijan wa!

Aben lak na geig an lo per dupano wa!”

¹¹ Agog Jesus Jerusalem na iladug yaug, tempel san sep lo iladu ya. Agog aban ile itilanig mel ante dien dan fidian yil se ya. Gurai idu la yan ninen o tempel lubanek ibiseig kuai te ilasag megeloum adi dida dumul go Betani na diau a.

Jesus ai gurab imisilani a

Mat 21:18-19

¹² Dien go tidom lom saen Betani dibisei man, Jesus imatigen. ¹³ Agog malan yaug, asau mi ai gurab ta ile ya. Gurab an roun mutunol tinan. Ago tag yaug sumeik go nujon aban an ile, ak man nujon an tia, roun kawan mi a. Man dugo, nujon ifu san nal gamugo da. ¹⁴ Ago tag Jesus ai an ipeig ibol, “Talpein ta on nujo fon ta yani na wa.” Jesus ago ibol dugo megeloum adi awan dulon a.

Jesus tamol tempel san ar ilon lo didaen digane se yan ikudai a

Mat 21:12-17; Luk 19:45-48; Jon 2:13-22

¹⁵ Jesus imul Jerusalem na yaug, tempel san sep ilon lo iladug, aben ante dader tamol adi, agod a melmel moni nam didad se yan dam fidian ikudaig kuai te dilasa ya. Insad tebol fufo moni dubulsa se yan, iratitalaig

yabibol idu dugo, tamol aenta muluk didad se yan sad kalik dam iratitale idu ya. ¹⁶Agog tamolpein tempel san tom ilon lo melmel disini diau wo man ninen o ipadau a. ¹⁷Agog ipitenjanaig kududod yabig igo ibol, “Ru e Anut san buk lo digire man,

‘Ŋaisag ab en gudanek san ago dubol a,

ante man tan fidian san tamolpein ka dugudani wa.’

Ak man an agane ilasag ‘gumagam adi sad mianuk ab’ igo yen da.”

¹⁸Pris gurman adi agod kubiaen san girek manau adi ru an dulonj a. Ago tag dal ta ate Jesus daonj dupani san ninen o abanj diabi se ya. Inj itaot dufuni imat san tia ya, man dugo, inj ninen o direr. Inj dulonj ak tamolpein malan tubun injsan pitenjanek dulonj dugo an ninen o fidian durut saian a.

¹⁹Aria, saen ad idu yau man Jesus injanen megeloum adi dida Jerusalem dibiseig diau a.

Ai gurab a Jesus imisilani an ibun a

Mat 21:20-22

²⁰Dien go tidom lom mi fon turenj diabi dugo ai gurab a nor Jesus ipei funi an dile ya. Ai an dabin ateg yang ulun na man ibun idu ya. ²¹Pita ru a Jesus nor ibol an ilon isoug irupe, “Tubun en, ule. Ai gurab onj misilani an ibun idu ya!”

²²Jesus ru naon irupidaig igo ibol, “Anj Anut lo ilo rumok amam da amado wa. ²³Ŋai rumok njurupaianj da, talpein ta inj ka did en igo irupe, ‘Onj masap, se ibulo beig lo waup udu.’ Ago dop ilon ta uraru na dop, ru a ibol an nunjon ilasa wak ago ilon lo rumok nunjon tap, ibol ago mi injsan na ka ago ilasa wa. ²⁴Amaiak ninen o ŋai njurupaianj da, onj gudanek lo mel ta wo Anut sumiani dop, inj mel an ipano la yak igo wonj ago ilo lo rumok a. Ago gane tap, mel an onj da wa. ²⁵⁻²⁶Agod saen onj utur onj Anut gudani dan man, talpein ta ida ru ama da tap, malmalan ilo lo saian an sasi pani wa. Agop onjane Tama kumaen panu lo yan inj dam onjane saian an isasi pano wa.”

Inj Jesus dusumiani, Enti kob ipano ya?

Mat 21:23-27; Luk 20:1-8

²⁷Agog fon Jerusalem na dilasag, Jesus tempel san tom ilon lo yang itor dugo, pris gurman, kubiaen san girek manau adi, agod tamol tutubu yak adi injsan na dupalu ya. ²⁸Agog dusumiani, “Onj kob en dabai da dugon te njaneg lo mel en gane dak i? Enti mok dabai en ipanog ate urat en gane wo ibol ak i?”

²⁹Jesus awad yabig igo ibol, “Ŋai dam mel ta ninen o an njusumiananj o da. Ago dop anj imug njasag sumianek an itaot arupaiaj tap, enti mok inj urat e njigane den san dabai ipanag an ka njabol pe alonj a. ³⁰En dugo ilom

isou di? Jon san suguek man, kagin an dugon te ijane yak i? An kumaen panu san mel, tia, an tamol sad mi ak i? Abol njalonj!”

³¹Agog injsed nugnug lo igo dijnijen se ya. “En man kumaen panu san mel, ago tabol tap, ij igo ibol isumianad a, ‘En ata wo an ij njen o ilom ta rumok na i?’ ³²Ak gug ‘En man tamol sad mel mi a,’ ago tabol tap, id o dugo ilasa wak i?” (Tamol tutubu emaiak tamolpein kawan ak njedi wo tarer na ya, ata wo, tamolpein kawan ak sad ilo sou lo man, Jon mi ij profet.)

³³Man njen o ij igo dubol durupe, “Man ta malonj na ya.”

Ago tag Jesus ibol, “Ago yak njen o naj dam enti dabai en ipanag go ate urat e njigane den ta njurupaianj na wa.”

Abi san kagin panek adi sad ru fajan

Mat 21:33-46; Luk 20:9-19

12 ¹Kubiaek an itout gug, Jesus ru fajan lo kubiaenj tamol adi naod na igo ibol ilasa, “Tamol ta ij ai wain san abi yabig ar ifou ya. Abi an ilon lo wain patun dupartitale dop dupipi san gib yabi a. Agod ij ab dam abi ilon lo yabi a. Agog ij tamol ta abi an kagin dupani san ipilianaig, abi an banid lo idiri a. Aria, saen abi taman ij urat an fidian igane itout man, imasag tan asau ak ate yau a. ²Saen ai wain nujon ifu san nal idu man, ij inanen biabi njalanj ta idinig inanen wain nujon aenta isini ipalu wo yau a. ³Ak man urat tamol a abi lo dumado dan dumasag, tamol an diabig dufunig digane imul go banin kawan yau a. ⁴Ago tag abi taman fon urat pinein sen ta idinig yau a. Ak man dumasag kabujan ate dufunig tinin malan dusue saian a. ⁵Aria, urat pinein sen ta idinig yau a. Agog dufuni imat a. Nek ago mi, ij urat pinein aenkadi wei mi idinaig diau a. Gug abi kagin panek adi aenta dufu dugo aenkadi dufu dumat a.

⁶“Ago igane yaug tamol an talpein kisaek o lian idinip yau san imado. Agod talpein an injsiganen nanun mok njen o tubun mi imat da. Wadan lo nanun en idinig yau a, man dugo, abi taman ilo sou igane man, ‘Ij njaineg nanuk awan kagin dupani wa.’

⁷“Ak man tamol abi lo urat digane dan, injsed nug lo igo dubol, ‘Tamol e ipalu yen man taman san melmel fidian mi ijane wo da. Ago yak njen o id tufunip imat dop, injsan abi id tinjane wa.’ ⁸Ago dubol go dumasag diabig dufunig imat go tubabun dubal go ar patun fo ilasa ya.

⁹“Aria, abi taman dugo igane wak i? Ij abi lo yaup abi kagin panek adi daonj ipidinaip abi an banid na ipasip urat tamol senamo yak banid lo igane wa. ¹⁰Nag an ru e girek lo yen den ta asuti na i?

‘Pat nek a ab bek tamol adi dumoi dan,
nek amaiak ab tinin fidian yabi sakar da.

¹¹Anut sen ago igane ya,

agod id malad lo en man siŋaokan geig a.’ ”

¹²Agog tamol tutubu yan an dal ta Jesus diabi san maeg diganeg aban dile se ya. Man dugo, iŋ duloŋ ak Jesus iŋanen ru lo iŋ isiai se ya. Ak man ta dusbani na ya, ata wo, tamolpein malan tubun dutumani an niŋedi wo direr, ago yak niŋen o Jesus dibiseig diau a.

Kaisa san takis ŋilaŋal

Mat 22:15-22; Luk 20:20-26

¹³Agog tamol tutubui adi iŋ Farisi aenta agod Herod san tamol aenta dam didinaig, Jesus san na diau a. Iŋ Jesus dibitinae dop siganen ru lo diabi wo ilod yen ak atem diau a. ¹⁴Aria, iŋ Jesus san na dilasag durupe, “Girek maŋau, maŋ malon ak oŋ ru rumok san tamol. Oŋ tamol senamo yak oŋ niŋe wo ilod isou dan niŋen o ta urer na da. Man dugo, gidad yaŋad amad da yak, tia yak dam, niŋedi wo oŋ ilo ta weiwei na da. Fun an lo oŋ tamolpein Anut san dal an niŋen o ru rumok nam itaot mi piteŋanai da. Id Kaisa takis moni tupani wan uyan ak i? Tia, saian ak i? Idsad kubiaen mel en niŋen o dugo ibol dan ubol malon. ¹⁵Id ka tadad ak i? Tia, tia yak i? Itaot rupaiaama.”

Ak man Jesus tamol adi an balek rararu san kagin lo dubol an ilon uyanan a. An niŋen o iŋ isumianaig ibol, “Aŋ ata wo bitinaek lo aginiag dak i? Aŋ moni ta asini apalup ŋile.” ¹⁶Agog moni ta disinig san na dupalug dupani a. Agog isumianai, “Mitilaen e fufo yaŋak digire yen enti san ak i?”

Agog awan diabig dubol, “Kaisa san.”

¹⁷Agog tag Jesus ibol irupidai, “An niŋen o aŋ mel ta Kaisa san tap, Kaisa apani wa, agod mel ta Anut san tap, Anut apani wa.”

Ru an duloŋ go durut saian geig a.

Sadyusi adi Jesus diabi wo bitinaek lo digane ya

Mat 22:23-33; Luk 20:27-40

¹⁸Agog Sadyusi adi maten lo kumaen masa san tia ago ilod isou dan sumiaen kisaek da Jesus san na dupalu ya. ¹⁹“Girek maŋau, Moses gubak mi id o igo igire ya. Tamol ta iŋ nanuk aman tia yak imat go pein ak ibiseig imado tap, gidad tein imasap iwon ka iŋanep an lo tein imat la yan wagen lo nanuk idirai dilasa wa. ²⁰Aria, gubak mi man tein muroun nuŋod 7 maŋ lulunama lo dumado ya. Matu ak pein iŋaneg imado nag imat, ak gug iŋ nanuk aman tia ya. ²¹Ago yak niŋen o tein imasag matu imat an san pein iŋane ya. Tein bakan ak dam nanuk aman tia agog imat a, tein fon taidam iŋ dam nek ago mi, ²²nek ago mi yaug nuŋod 7 ante itout a. Tamol an fidian nanuk amad tia ya. Wadan lo man pein an dam imat a. ²³Saen tamolpein dumat la yan fon kumaen dumasa tap, tamol an ilod lo pein an enti mok iwon ak i? Oŋ ulon ak iŋ fidian iwodi a.”

²⁴Agog Jesus awad yabig ibol, “An afurfi saian geig a. Man ata wo? Anut san ru girek lo yen agod Anut san dabai dam an ta alon uyan na ya. ²⁵Saen tamol dumat pe dumasap kumaen panu na diau dop, pein ta dusu na wa, agod ante tamol man pein njied ta dupani na da. Tia, in kumaen panu san enjel igo wonj dumado wa. ²⁶Agod taida mi, tamol dumat ak fon kumaen dumasa wan njen o an kududom agure. Nag an ru a Anut irupaian an ta asuti na yak i? In igo ibol, ‘Jai man Abraham san Anut, nai dam Aisak san Anut, agod nai dam Jakob san Anut.’ ²⁷Anut man in tamol dumat ak sad Anut tia ya. Tia, in man tamol kumaed dumado dak sadi a. Rumok nunon, an afurfi saian geig a!”

Kubiaen dugomaiak malan te yak i?

Mat 22:34-40; Luk 10:25-28

²⁸Kubiaen san girek manau ta ipalug Jesus Sadyusi dida ru lo nug diabi yau imul dugo ilon a. Ru naon sijaokan Jesus irupidai an ilon tag, in dam Jesus isumianig ibol, “Kubiaen dugomaiak malan te yak i?”

²⁹Jesus awan yabig igo ibol, “Kubiaen malan te yak nek en: ‘O Isrel adi, kududom agure wa. Idsad Anut man Tubun en kisaek o lian a. ³⁰Tubun en onane Anut njen o umat a, onane bube fidian lo, onane njutu fidian lo, onane ilo sou fidian lo, agod onane dabai fidian lo ago gane wa.’

³¹Kubiaen turan man igo ya. ‘On nek ibol onse nje wo umat dak ago mi tamolpein aenta dam njedi wo umat a.’ Kubiaen ta in kubiaen uraru en irinanai man tia ya.”

³²Agog kubiaen tamol an igo ibol, “Girek manau, on ubol uyanan ak, Anut in kisaek o lian, agod in sen kisaek mi imado da, tubud taida man tia ya, ru an rumok nunon. ³³Agod talpein ta in buben fidian lo, inanen ilo sou fidian lo, inanen dabai fidian lo yak Anut njen o imat, agod inanen tamolpein aenta nek ibol insen njen o imat dak on, ago mi njedi wo imat a. Kagin naok ago yak, yai niganag mudan Anut ipani san fidian mi irinanai geig a.”

³⁴Saen Jesus tamol an ru naon manau anda ipani an ile ilon man, in tamol an irupei, “On Anut san kagin panek ate asau mi ta mado na da.” Ru an itout go Jesus san ager adi sumiaek taida dusumiani wo fidian direr a.

Kristus in enti nanun ak i?

Mat 22:41-46; Luk 20:41-44

³⁵Jesus tempel san tumanek aben ilon lo tamolpein ipitejanai dugo sumianek ta ipidinai a. “En dugo wonj go kubiaen san girek manau adi, Kristus in Dawid nanun an dubol na yak i? ³⁶Dawid insen mi, Awan Urgan iduduwi dugo igo ibol:

“Tubun en naisag Tubun ak igo irupei,

“Onj nai tuog won ak ate masip mado,
murna gup nai onsa ager adi njidiraip,
onj jie pae na dumado dop jie nam partuanai a.”

³⁷Amaiak niŋen o Dawid iŋsen mi tamol an Tubun ak ibol tap, en dugo wonj pe iŋ Dawid nanun ak i?”

Tamolpein malan tubun ante dumado dan iŋsan ru duloŋ dugo ilod bulbal se ya.

Kubiaen san girek maŋau iŋ kagin saiak digane na ya

Mat 23:1-36; Luk 20:45-47

³⁸Jesus pitejanek ipidinai dugo irupidai, “Kubiaen san girek maŋau adi niŋedi wo kagin agane wa. Iŋ kulos milae milae siŋaokan ak didirip diaup didaen aben lo dutor dop aenkadi ilo uyan ru dupidinai o ago ilod yen da. ³⁹Agod ubou ab lo kalik malan te tamol tutubu ate dumasid dan iŋ ate dumado da. Agod soubul lo dam nek ago mi digane dop, tamolpein iŋ kagin dupidinai o ago digane da. Iŋ se pitianoŋ kagin naok naok igo yan niŋen o tubun mi dumat da. ⁴⁰Iŋ pein suos sad ab digam da. Agod gudanek milae milae kasik digane da, ak man an sen kawan digane da, man dugo, tamolpein dil o ilod yen da. Tamol naok ago man Anut san bitinaek nal lo naon saian geig a diŋane wan tamolpein aenta sad naon iriŋani geig a.”

Pein suos san lou panek tusan

Luk 21:1-4

⁴¹Aria, tempel san tom ilon lo aben titin ta yen dugo ate moni san kunup yen a. Ate Jesus kunup an kitek siŋiren na imasig imado dugo tamolpein wei mi dupalu dop moni kunup lo dubal dugo yil se ya. A filiad amad da yan wei mi moni tubun mi dubal se ya. ⁴²Agog pein suos filian aman tia yan iŋ dam ipalug pat bras uraru o lian an kunup lo ibal a. Naon man tusan a.

⁴³Jesus iŋanen megeloum igiaig san na dupalug irupidaig ibol, “Ŋai rumok ŋurupaiaŋ da. Moni e pein suos filian aman tia kunup lo ibal en, tamolpein fidian sad moni dubal an iriŋani geig a. ⁴⁴Man dugo, aenkadi iŋaned filiad tubun ak lo moni samun diŋaneg dubal a. Ak gug pein filian aman tia yan mel fidian lo katuk aman bo man, moni sapita iŋ da yan fidian mi ibal a. An lo sen aben ipitig itout a.”

Jesus tempel daon dupani wak niŋen o ibol a

Mat 24:1-2; Luk 21:5-6

13 ¹Saen Jesus tempel ibisei wo dugo megeloum ta igo ibol, “Girek maŋau, ule, tempel san pat tintinan nuŋon a, iŋsan naon man siŋaokan geig a!”

²Ak man in ru naon igo irupidai, “An ab tintinan en eil ak i? Njai ru rumok nrupaian da, ente man pat ta kisaek sen ta tinin fufo ta yen na wa. Tia, fidian mi tamol adi dugufututep diabibol tan na dudu wa.”

Nal wadan ilasa san kob funfun
Mat 10:17-22; 24:3-14; Luk 21:7-19

³Jesus Did Oliv fo imasig imado se ya. Did a ate imado yan did tempel fufo itur dan san turan, titinaem tan ikilokan ak yen da. Agog Pita, Jems, Jon di Andru da ago mianuk lo san na dupalug dusumianig igo dubol. ⁴“On rupaia, saen dugomaia lo melmel en dilasa wak i? Kob dugomaia imug mi ilasa dop ate man malon ak, melmel en fidian dilasa wak i?”

⁵Agog Jesus awa biek ru igo irupidai a. “An kagin agane wa, kabelan tamol ta an irawan banau. ⁶Tamol wei mi dupalup naj yanag dupatep dubol a, ‘Njai nek emaiak Kristus.’ Ago dop tamolpein wei kasik dirawai a. ⁷An yu ager alon ak, agod san ru tim dam alon a. Ago dop kagin agane wa, kabelan amasa saian banau, man dugo, mel en man ka ilasa wak, gug nal wadan san saen man gamugo da. ⁸Tamol malan ta lo yu diabisap, tamol malan ta lo yu ager digane wa. Ago dop kin ta inisan tamolpein dida yu diabisap, kin sen ta inanen tamolpein dida nug dufuni wa. Agod aben sensen lo man kadag^f tubun mi idu dop kanaurig tubun ak gidigidad dilasa wa. Nek ibol pein nanuk igansi wo dop madai ile dak igo won, melmel en fidian man, madai a nal wadan ilasa san amaiak ilasa wo fun igane da.”

⁹“An gidad tawan aganep amado wa. In an dibian pe ansganem panu lo ager adi banid lo didiran pe kot lo atur a. Juda adi sad ubou ab gidigidad dien dan lo an tinimi dugufutute wa. An naj naog ananep kin adi agod gabman gurman adi naod na atur a, an naj nineg o abol dop dulon a. ¹⁰Agod naineg bilalun uyanan en imug tamolpein warou adi tan tilianek fidian lo dubol ilasa dop dulon a. ¹¹Saen in an dibian pe kot lo dida au dop, ru dugomaia abol ak ninen o ilom ta weiwei na wa. Tia, nek ru dugo Anut saen an lo ipano an mi arupidai a, man dugo, ansem ta abol na da, tia, Awan Urgun in awam lo ibol ilasa da.

¹²“Tein ta in tein san ager adi banid lo iganep dufuni imat a. Taman ta dam nanun muroun sad ager banid lo idiraip daon dupidinai a. Nanuk dumasap tinad tamad lo siai diganep ager banid lo didiraip dufu dumat a. ¹³Tan en san tamolpein fidian an lo siai digane wa, en ata wo, naj yanag man ansam na yen la ya. Ak man, talpein inanen ilo rumok yabi sakar yaup, saen inanen kumaen tan en lo itout ak ate dop, Anut talpein an patun ipasi wa.

^f Futol

Murnap mel ta saian geig ak ilasa wa*Mat 24:15-28; Luk 21:20-24*

¹⁴“Saen ilasa dop, mel ta tempel san aben gun ak lo dugunip, mel an ate itur san tia yak ate itur dop ale wa. Mel an gubak mi profet Daniel niŋen o ibol a. Mel an Anut malan lo man iganan geig a, nek mel amaiak igane dop daonj panek ilasa wa. (Onj ru e suti den ulonj uyan o ta pasauman na yak man, maeg gane tap ka ulonj ak boi.) Nal an lo dop, tamolpein a Judea na dumado dan, dusol diaup did lulunad lo sed imianai a. ¹⁵Talpein ab fufo na imado dan, imul idup ab lo iŋanen biounj isini wo ta iladu na wa, tia, itaot mi isol yau a. ¹⁶Agod talpein abi lo imado dak dam, gidad imug mi yamel madid san ak iŋane wo ta imul yau na wa. ¹⁷O kabel, nal en san pein adi aŋ luam am da, agod aŋ pein aŋsam nanuk su apidinai dan dam, ŋai ilog tubun mi imunanaj da! Nal en man saian geig a. ¹⁸Aŋ gidad agudani dop, mel en madid san saen lo ta ilasa na wa. ¹⁹Man ata wo? Saen an lo dop muruan tubun geig ak ilasa wa. Muruan naok ago yak gubak mi ta ilasa na ya, saen tan en ilasag ipalug gamu en lo, mel igo yak ilasa man tia geig a, agod murnap fon ta ilasa da na wa. ²⁰Anut saen en itutep katukan a, iŋ ago ta igane na tap man, tamolpein fidian mi dideg diau a. Ak man, saen an lo dop Anut tamolpein a ipilianai la yan niŋedi wo ilon isou wa. Amaiak niŋen o iŋ saen an itutep katukan a. ²¹Nal en lo talpein ta aŋ irupaiaŋ pe ibol, ‘Ale, Kristus ente imado da!’ tia, ‘Iŋ onte imado da!’ ago ibol dop, aŋ ilom ta rumok na wa. ²²Man dugo, kristus sewak ak iŋ profet sewak adi dida dilasa wa, ago dop iŋ kulob girager ak, agod mel naon senamo geig ak tamolpein malad lo dukubiaip dile wa. An lo dop idaisuda tap, iŋ tamolpein a Anut ipilianai la yan dirawaip lo diau dudu wo ago maeg digane wa. ²³Amaiak niŋen o aŋ tawaŋ aganep amado wa. Mel en gamugo ilasa dugo ŋai imug mi mel emaiak niŋen o kuai tem ŋurupaiaŋ la ya.”

Murnap Tamol Nanun tan na imul ipalu wa*Mat 24:29-31; Luk 21:25-28*

²⁴“Saen en san muruan tubun ak itout la gup,
 ‘ad ta ided uyan na wa, an lo dop adian tidom onj ilasa dop
 kalam ta ided na wa.

²⁵Ante dop patui keit dibiseip dudu wa,
 agod Anut iŋ mel dababai keit lo yak imiriranai a.’ ”

²⁶“Saen an lo dop, tamolpein iŋ Tamol Nanun keit san timtaen fufo na itur dop dabai agod girager tubun geig aman da yak lo ipalu dak dile wa. ²⁷Ago dop Tamol Nanun iŋanen eŋel adi idiraip dufufurak diau a. Ante dop iŋanen tamolpein kob ipidinai an dutumanai a. Iŋ tim sukurun

iwoiwo an lo nap diŋal dupalu wa, ago mi yaup tan gigin itout ak ate wa.”

Ai gurab san ru fajan
Mat 24:32-35; Luk 21:29-33

²⁸“An ai gurab lo ilo sou agane wa, iŋ maŋau ka ipanaŋ a. Saen iŋsan raen you aman da, agod roun foun ilasa dop, an alon ak madid itout go ad ilasa san saen sumeik ipani da. ²⁹Amaiak niŋen o, an murnap melmel fidian e dilasa den, ale dop, an alon ak Tamol Nanun iŋ ipalug sumeik, dalawan ante itur da. ³⁰Ŋai rumok ŋurupaian da. Warou gamu en san tamolpein gamugo itout yau dop melmel en fidian dilasa wa. ³¹Keit iŋ tan da iŋ murnap itout a, ak gug ŋaisag ru man ta itout na wa.”

Nal mok mel en ilasa wan id fidian niŋen o tiŋaon a
Mat 24:36-44

³²“Ak gug talpein ta melmel an niŋedi wo nal dugo di auwa dugo dam dilasa san o ta ilon na ya. Kumaen panu san eŋel adi ta dulon na yak, agod Nanun sen dam ta ilon na ya. Bai iŋsen mi ilon a. ³³Amaiak niŋen o an tawaŋ agane wa. An malam ipuk on amado wa. An ta alon na yak nal dugo lo ananem Tubun ak ipalu wa. ³⁴En man igo ya. Tamol ta iŋ tan asau ak ate yau o dugo iŋanen urat biabi urat pinein banid lo iganep, anen anen iŋsiganed urat ipidinai a. Ago dop dalawan titianek tamol irupei, ‘On ŋai ŋamul ŋupalu san niŋen o tawaŋ ganep mado wa.’

³⁵“Amaiak niŋen o an tawaŋ ganep amado wa, man dugo, nal mok lo ab taman imul ipalu wak an ta alon na ya. Gurai lo boi, tidom tubun lo boi, kurek ibob san saen lo boi, tidom lom mi boi, an aŋaon da. ³⁶Iŋ ririan imul ipalu dop, an kabelan ŋion abip amado dop ilian banau. ³⁷Ru e ŋai ŋurupaian den, ru kisaek mi tamolpein fidian ŋurupidai da: ‘Tawaŋ ganep amado!’ ”

Gurman adi Jesus dufuni imat o awad dutumani a
Mat 26:1-5; Luk 22:1-2; Jon 11:45-53

14 ¹Tumanek tubun ak yaŋan Pasova dubol dan san saen idu san, nal uraru o lian yen da. An itout gup, tumanek aenta yaŋan Bret Yis Aman Tia ak San Soubul dubol dan ilasa wa. Pris gurman adi agod kubiaen san girek maŋau adi iŋ dal ta pasak nam ate Jesus diabip dufuni imat san niŋen o aban diabi se ya. ²Agog dubol, “Soubul nal tutubu e ilasa den lo ta tigane na wa, kabelan tamolpein dile dop dumasap ager diganep aben daon dupani banau.”

Pein ta Betani na gureŋ Jesus kabuŋan fufo ikulmaek a
Mat 26:6-13; Jon 12:1-8

³Jesus iŋ Betani panu na imado dugo, tamol ta yaŋan Saimon tinin lepra aman da yak san ab lo ida dumado se ya. Iŋ tebol giranen na imasig

imado dugo inuai se ya. Ago dugo pein ta in gureŋ, pat butol alabasta nam digane yan siŋaokan ak, isinig san na ipalu ya. Butol an ilon lo gureŋ naon lak na geig ak, yaŋan nard dubol dan, awan isa. Aria, Jesus anaŋ yani dugo pein an ilasag, butol buron ibalsinig gureŋ an kabuŋan fufo na iwali idu ya.

⁴Saen aenta ate dumado yan mel ago dile man, tiŋaед saian go nug lo dubol ila iso se, “En ata wo oŋ gureŋ kawan biđani dak i? ⁵Gidad tubuseip, tamol didad pe moni tubun mi lo tiŋane wa. Tamol ta anaŋar kisaek urat igane dak san naon, moni nek ago yak ka tiŋane wa. Ago dop tamol filiad tia yak ka tupidinai a.” Agog ru dabai nam pein an dupei a.

⁶Ak man Jesus ibol irupidai, “Aŋ pein en abisei! En ata wo muruan apani dak i? In man ŋai niŋeg o kulob siŋaokan geig ak igane ya. ⁷Saen fidian tamolpein filiad tia yak dida amado da, agod aŋ ka aŋanem ilobol lo abinawai a, ak gug ŋai man saen milaen aŋ da ta tumado na wa. ⁸In mel kabelan igane wo idaisuda yan ago igane ya. In ŋai tinig fufo gureŋ iwali an lo man, in ŋaisag sisanug mutou lo digane wak san dal ikubune ya. ⁹Iai ru rumok ŋurupaiaŋ da. Tan dugon te bilaluŋ uyanan en dubol ilasa wan, ante dam kulob e pein emaiak igane yen niŋen o dubol ilasap, lo pein en niŋen o ilo sou digane wa.”

Judas Jesus ager adi banid lo igane san promis ipidinai a

Mat 26:14-16; Luk 22:3-6

¹⁰Agog Jesus san megeloum 12 an ilon lo tamol kisaek, yaŋan Judas Iskeriot, imasag pris gurman adi sad na yaug, Jesus ager adi banid lo igane wo ilon ago ibol dan irupidai a. ¹¹Ru an duloŋ go ilod uyanan a, ago tag in moni dupani wo ru dufuni a. Amaiak niŋen o nal an log ipalu, dal uyan ak ta ilep ate Jesus banid lo igane san niŋen o abaŋ yabi se ya.

Jesus saen wadan megeloum dida anaŋ diani a

Mat 26:17-25; Luk 22:7-14,21-23; Jon 13:21-30

¹²Bret yis aman tia yak san soubul gun, inŋsan nal malmalan lo, megeloum adi Jesus san na dupalu ya. Nal an san saen lo man Isrel adi Pasova san sipsip nanun dufu dumat san a. Megeloum Jesus san na dilasag dusumianig dubol, “Oŋsa ilo lo, dugon te maup melmel mukubinep oŋ ate Pasova san anaŋ wani wo ubol dak i?”

¹³An lo Jesus megeloum nuŋod uraru itarpasaig igo irupidai, “Aŋ aup taun tubun ak lo aladu wa. Ante man tamol ta you kapen anda isini ipalu dop iliaŋ a. Ago dop ŋien aban ari wa. ¹⁴Ab dugon te iladu wan, aŋ dam ilon lo asudap, ab taman igo abol arupe, ‘Girek Maŋau igo isumiaen a, galuŋ dugomaiak lo, ate ŋaineg megeloum dida Pasova anaŋ mani wak i?’ ¹⁵Agop galuŋ tubun a ab fufo yen dan, agod ilon lo mel fidian dukubune lag idaisuda yen dan ikubiai panaŋ a. Ante idsad anaŋ akubune wa.”

¹⁶ Megeloum uraru an dal diabig taun tubun ak lo diau a. Ante mel fidian Jesus ibol ago mi dile ya, agog Pasova san anaj dukubune ya.

¹⁷ Gurai idu dugo Jesus inanen megeloum 12 dida dupalu ya. ¹⁸ Saen in sisem tebol giranjen na dumasig anaj diani dugo, Jesus igo ibol, “Ŋai rumok ŋurupaian da, tamol ta ete ŋai da anaj tani tumado den, in ŋai ager adi banid lo iginiag ŋau a.”

¹⁹ Ru an dulon go ilod muruan idu ya. Agog in sed kisaek kisaek Jesus dusumianig dubol se, “Dugo ŋai tia i?” Ago ago dubol yau se ya.

²⁰ Jesus ru naon ibol, “Tamol en man megeloum 12 lulunam lo imado da. Tamol nek a bret inanep daeg san tuor lo ŋai da sisem banima idu dan, nek amaiak ŋai ibilag pe ager banid lo ŋau a. ²¹ Tamol Nanun in nek ibol ru buk lo in ninen o digire an, nek ago mi yau da. Ak gug tamol enti a Tamol Nanun inanep inanen ager adi sad tuod lo yau an, rumok in muruan tubun kasik ak ile wa! An lo gidad tamol an san tinan ta igansi na tap, an in o uyanan mok a.”

Jesus in bret agod wain da inaneg megeloum ipidinai a

Mat 26:26-30; Luk 22:14-20; 1Kor 11:23-25

²² Aria, in anaj diani dugo Jesus bret inaneg, Anut ilo uyan ru ipanig yafuteg, inanen megeloum ipidinai dugo ibol, “An anane, en man ŋaisag tinig.”

²³ Agog wain gab inaneg, Anut ilo uyan ipanig, iwae pidinaig, in fidian lo duluk a. ²⁴ Agog in irupidaig ibol, “En man kontrak san dar, tamolpein wei mi sad aupasek isuas o ŋuwali idu wa. ²⁵ Ŋai rumok ŋurupaian da, ŋai fon ai wain san nuon lo ta ŋaluk na wa, ago yaup nal amaiak ante ŋai fon an da Anut san kagin panek aben lo taluk la gup ilasa wa.”

²⁶ Agog in Isrel san bar ta diabig itout go galun an dibiseig Did Oliv fo na disuda diau a.

Jesus Pita in ninen o itot ak ago ibol a

Mat 26:31-35; Luk 22:31-34; Jon 13:36-38

²⁷ Diau dugo Jesus inanen megeloum adi ru igo irupidai, “Gamu tidom nek en lo, an fidian mi ŋai ninjeg o ilom idu yaup abisawag a. Man dugo, Anut san girek lo ru igo ibol,

‘Ŋai titianek tamol ŋufuni wa,

agop in san sipsip adi dusol gidigheid diau a.’

²⁸ Ak man Anut ŋai ibiagsap fon ŋumasa la gup, ŋai an naom na imug mi Galili na ŋau a.”

²⁹ Pita irupeig ibol, “Tamol fidian in bo on ninge wo ilod idup dubusawo wak gug, ŋai man tia wa!”

³⁰ Jesus awan yabig ibol, “Ŋai rumok ŋurupaio da, gamu tidom nek en lo kurek saen uraru gamugo ibob dop, nal utol on ŋai utot a.”

³¹Ak man Pita ru dabai ak nam irupe, “Gidad, ɲai oŋ da tamat bo man, ɲai oŋ ɲiŋe wo ta ɲatot na wa, tia geig a!” Ago dugo megeloum fidian mi nek ago mi dubol se ya.

Jesus Getsemani na igudani a

Mat 26:36-46; Luk 22:39-46

³²Ago man Jesus iŋ dida, aben ta yaŋan Getsemani dubol dan ate diau a. Ante iŋ megeloum adi irupidai, “Aŋ ente amasip amado dop, ɲai titin onte ɲaup gudanek ɲigane wo da.” ³³Agog iŋ Pita, Jems agod Jon dida iŋal go diau a. Saen an lo iŋ fun iganeg ilon ipapao⁸ dugo ilon dam muruan idu se ya. ³⁴An lo igo irupidai, “Ŋai ilog tubun mi muruan dugo ɲamat o sumeik da. Aŋ gidad ete ɲai da malad ipuk pe tumado wa.”

³⁵Ago dugo iŋ ipar kitek ilag, sen ibilig tan fo idug yen dugo Anut igudani man, isop Anut ilon tap, nal en san muruan ka ipasi pani wa. ³⁶Iŋ igo ibol, “Bai, ɲai Tamag, oŋ mel fidian ka gane wo idaisuda ya. Oŋ gab en ɲai banig lo ka pasi wa. Ak gug oŋ ɲaisag ilog ta uri na wa, tia, oŋ man oŋsina ilo mi uri wa.”

³⁷Agog iŋ iŋanen megeloum adi sad na ipalug, malan yaug dien dugo yil a. An lo iŋ Pita irupeig isumiani, “Saimon, en dugo, oŋ ɲioŋ wabi di? Oŋ auwa kisaek ɲai da malad ipuk pe tumado san ta idaisuda na yak i? ³⁸Oŋ mala ipuk dop mosiai a, man dugo, kabelan mel ta ikubiano san ipalup ilio banau. Rumok, ilo ibol dak gug tini dabai ama tia ya.”

³⁹Iŋ saen uraru imul yaug ago mi imosiai a. ⁴⁰Saen imul ipalu man ɲioŋ diabi dugo yil da ya, man dugo, malad muruan geig a. Iŋ ata ru durupe san ta dulong na ya.

⁴¹Saen utol imosiai itout gug, megeloum adi fon sad na ipalug igo irupidai, “Aŋ ɲioŋ abi dugo yaes abal yau dak i? An nek a! Ale, ɲaisag saen idu wo da, Tamol Nanun aupasek tamol adi tuod lo digane san saen idu la ya. ⁴²Amasap, tau o da. Ale, tamol enti a ɲai ager tuod lo isodudunag san man sumeik ipanad la ya!”

Ager tamol adi Jesus diabi a

Mat 26:47-56; Luk 22:47-53; Jon 18:3-12

⁴³Jesus iŋiŋeŋ go imado dugo Judas ipalu ya. Iŋ megeloum nuŋod 12 ak lulunad lo mi aben aman da ya. Iŋ ipalu dugo ida tumanek malan tubun ak iŋ sabiri agod tok dam duburoug naon na dilasa ya. Pris tutubu yak, kubiaen san girek maŋau adi, agod Isrel adi sad tamol gurman didinaig dupalu ya. ⁴⁴Imug mi palaŋ niganag tamol a iŋ tuod lo igane san man, kob ta dam ɲiŋen o igo irupidai, “Tamol a ɲai musuk ɲupani dop ale wan, nek an Jesus, aŋ tamol amaiak abip yu tamol adi dulubanip

⁸ Ilon itau

diñanep dida diau a.” ⁴⁵Aria, in̄ Jesus san na ipalu kisaek on̄ go ibol, “O girek mañau” Ago ibol go musuk ipani a. ⁴⁶Agog in̄ Jesus duparsikawig diabig dusubani a. ⁴⁷An lo man tamol ta in̄ Jesus siñiren na itur an, sinan sabiri igursi go pris gurman san urat pinein ifunig, kududon ituteg idu ya.

⁴⁸Jesus in̄anen ager adi irupidaig ibol, “En ata wo an̄ sabiri in̄ ai tok da asinig aliag pe abiag o apalu yak i? Ak dugo, ñai man wagai adi gabman mabi idu san gurman igo won̄ ago ilom isou di? Nal fidian ñai tempel aben lo ñumasi dugo ñupitejanai se ya, ak gug an̄ ñai ta abiag na ya. ⁴⁹Ak man melmel en fidian ilasa san fun man, ru gubak mi Anut san buk lo digire yan gamu en nuñon ilasa wa.” ⁵⁰Agog megeloum adi fidian mi Jesus dubuseig dusol go diau a.

⁵¹Pinein ta, tinin yamel ta itabug on̄, Jesus ñien aban iri se ya. Saen Jesus san ager adi pinein en dile man, diabi wo duparsikawi a. In̄san yamel diabi a, gug in̄ yamel iragalig, banid lo ikisaluk ilasag, ⁵²yamel banid lo ibiseig taen kawan isol go yau a.

Jesus pris gurman naon na ru lo itur a

Mat 26:57-68; Luk 22:54-55,63-71; Jon 18:13-14,19-24

⁵³Tamol adi Jesus diabi an, diñaneg pris gurman san ab lo diau a. Ante man kubiaen̄ san girek mañau adi, pris tutubui adi agod Isrel san gurman adi dutumani lag malan digane se ya. ⁵⁴Ak man Pita in̄ Jesus ñien aban irig diau ak gug, in̄ kitek asau mi imado ya. In̄ pris gurman san ar lo iladug ai katuk adi dida dumado ya. Tidom an madid niñen o yai lo tinid isue dugo dumado se ya.

⁵⁵Pris tutubui adi, agod kaunsil fidian mi, tamol aenta digiaig sewak ru dubol dop, Jesus kagin saiak ta igane yak tap, ate dufunip imat san dal ta dile wo dukubiai na ya. ⁵⁶Ak man tamol wei mi sewak ru amad da yan naod na dilasa bo man, dal ta dile man tia ya, man dugo, ru ta naon kisaek dubol ilasa man tia ya.

⁵⁷Agog tamol aenta dutur man Jesus tinin lo dusupaleg igo dubol, ⁵⁸“Mañ ru igo ibol dugo malon̄ a. ‘Ñai tempel e tamol banid nam dususe yen ñurubep, nal utol lo mi foun ak ñabisa wa, an man tamol banid nam ta dususe na ya.’ ” ⁵⁹Gug dal sensen lo dam ru an dubol se ya, ru naon kisaek tia ya.

⁶⁰Ago dugo pris gurman in̄ naod na itur dugo igo ibol Jesus isumiani, “On̄ ru naon ta ubol san tia yak i? Ru e on̄ niñe wo tamol emaiak dubol den dugo yak i?” ⁶¹Ak man Jesus ru ta ibol man tia ya, itokubol itur se ya.

Agog pris gurman fon Jesus isumiani, “Dugo, on̄ Kristus, Anut Nanun i?”

⁶²Ago man Jesus igo ibol irupeï, “Awo, ñai mi Kristus. An̄ murna gup Tamol Nanun in̄ Dabai Tubun Geig ak san banin won̄ ak ate imasi dop ale

wa. Agod Tamol Nanun keit san timtaen fufo na imado dop ipalu wa, mel amaiak dam ale wa.”

⁶³Agog pris gurman, ru an niŋen o imasa saian go iŋanen kulos irasireg igo ibol, “Gidad, tamol taidam, tamol en san kagin niŋen o dubol ilasa san id ta tigiai na wa. ⁶⁴Man dugo, gamu geig iŋanen ru lo Anut yaŋan irube idu yan aŋsem alon a. Aŋsam ilo sou lo, dugo won id tamol en niŋen o tigane wak i?”

Iŋ fidian dubol ak, tamol en mel saian geig ak igane, an niŋen o ka imat on a. ⁶⁵Ago man iŋ Jesus naon fo na dulusu se ya. Aenta Jesus yamel nam malan dufoug banid nam dufuni dugo naon dugufute on dugo igo dubol se, “Profet ru ubol ilasa!” Ago dugo yu tamol adi tinin dusue ditare se ya.

Pita Jesus niŋen o itot a

Mat 26:69-75; Luk 22:56-62; Jon 18:15-18,25-27

⁶⁶Aria, Pita iŋ ab patun fo ar ilon lo imado dugo, pris gurman san urat pein ta siŋiren na ipalu ya. ⁶⁷Saen Pita yai giranen na tinin isue dugo ile man, malan ti ibol go irupe, “On dam Nasaret tamol amaiak ida amado na ya.”

⁶⁸Ago dugo Pita ru a pein ibol an niŋen o itot go igo ibol, “Ru on ubol dan ŋai ta ŋalon na ya, ŋai mel en niŋen o ŋiŋaon geig a.” Ago ibol go yaug ar san dalawan te imado.

⁶⁹Murna gug dalawan te imado dugo, urat pein an fon ileg niŋen o tamolpein sumeik dumado yan fidian irupidai, “Tamol en iŋ lulunad lo imado se ya.” ⁷⁰Pita fon itot a.

Saen kitekan go tamol adi sumeik dutur an Pita durupeig dubol, “Rumok geig, on iŋ lulunad lo mado da, man ata wo, on Galili tamol.”

⁷¹Agog Pita iŋ Anut misilanek ru ka ipani wan niŋen o ru naok ago yan lo, fun iganeg sen imisilanig igo ibol, “Ŋai tamol en niŋen o abol den ta ŋalon na ya.”

⁷²Iŋ ru ibol itout dugo, kurek saen uraru ibob kisaek on a. Ago dugo Pita iŋ Jesus ru ibol an ilon isou a, “Kurek gamugo saen uraru ibob dop, saen utol ŋai ta ulon na yak ubol a.” Ago man iŋ ilon ipapaog tinaŋ tubun mi igane se ya.

Jesus diŋaneg, Pailat san na diau a

Mat 27:1-2,11-14; Luk 23:1-5; Jon 18:28-38

15 ¹Salso idu dugo pris tutubui adi, Isrel tamolpein sad gurman adi, kubiaen san girek maŋau adi, agod iŋaned Sanhedrin kaunsil fidian mi mel dugomaiak digane wo awad kisaek a. Agog Jesus banin dusubanig, diŋaneg, diaug Pailat banin lo digane ya.

²Pailat Jesus isumiani, “On Juda sad kiŋ ak i?”

Jesus ru naon irupeï, “Awo, onse nek ubol a.”

³Agog pris gurman adi ru wei kasik Jesus tinin dusupaleg dubol se ya. ⁴Amaïak nînen o Pailat irupeïg isumiani, “Ulon, in ru sapita wei mi dupano da. Ak dugo, on ru naon ta ubol san tia yak i?”

⁵Ak man Jesus ru naon ta Pailat irupeï man tia ya, an nînen o Pailat ilo sou wei mi igane se ya.

Pailat Jesus aigim fo dibali wo ibol a

Mat 27:15-26; Luk 23:13-25; Jon 18:39–19:16

⁶Aria, ananjar fidian, tumanek gun an san saen lo mi, inaned tamol kagin igo ya. Gabman san tamol malan te yak, subanek tamol kisaek o lian amaïak tamolpein yanan dupate dop, ipasip kawan imado wa. ⁷Saen an lo man tamol ta yanan Barabas in wagai tamol aenta dida subanek lo dumado ya. Wagai tamol emaiak Rom gabman malan dusue wo dumasag ager diganeg tamol aenta dufu dumat a. ⁸Aria, tamolpein dutumanig dutur den Pailat san na duparsikawig dusumiani man, kagin a gubak mi iri na yan gamu en dam iri wa.

⁹Agog Pailat doup tubun adi isumianaig ibol, “An ilom dugo ibol di? Juda sad kin nûbuseip ansam na imul o?” ¹⁰In ilon uyan ak man, tamol adi an in turak susai lo mi Jesus dijaneg kot lo dupalu ya. ¹¹Ak gug pris tutubui adi tamolpein dududuwai dugo ilod diabisa dop, in Pailat duwagin pe Barabas ipasi wo dubol a.

¹²Agog Pailat ibol isumianai, “Ago yak nînen o ansam ilo sou lo, Jesus e an Kristus abol den nînen o nai dugo ngane wak i?”

¹³Agog in disasai, “Aigim fo bali wa!”

¹⁴Pailat isumianai da, “An ata mel o? In ata mel saian ak igane yak i?” Ak man in awad tubun mi geig disasai, “Aigim fo bali wa!”

¹⁵Man nînen o Pailat doup tubun an ilo uyan ipidinai o ilon ago ibol ak nînen o, in Barabas insad na ipasi a. Agog ru iganeg Jesus diabig rasau nam dufuni a. Dufunig itout go inanen yu tamol adi banid lo aigim fo dibali wo igane ya.

Yu tamol adi Jesus kukok aman digane ya

Mat 27:27-31; Jon 19:2-3

¹⁶Agog gabman malan te yan san yu tamol adi, Jesus dijaneg gabman san ab lo diau a. Ante man in Pailat san yu sawar fidian mi dupalu wo digiai a. Dupalug Jesus san na dutumanig dubuluwi a. ¹⁷In yamel daran ak ta tinin fo na ditabug pani a. Ago dugo in kam dudurun aman da yak, kin san kitikat igo won ditiladeg, Jesus kabunan fo na disisi idu ya. ¹⁸Agog in kukok aman digane dugo igo dubol, “Per o, Juda sad Kin!” ¹⁹Agog tinin fo dulusu se ya, ago dugo makud dijaneg ate kabunan te dufuni idu se ya. Ago dugo naon na turud disoluwig, yanan diabisa dugo kukok aman

digane se ya. ²⁰Saen kukok aman digane itout man, yamel dupasig tinin fo injsiganen kulos digane pani a. Agog aigim fo dibali wo dijaneg diau a.

Jesus aigim fo dibali a

Mat 27:32-44; Luk 23:26-43; Jon 19:17-27

²¹Jesus dijaneg turenj diabig diau dugo, yu tamol adi dal na taun Sairini san tamol, yajan Saimon, dile ya. Inj man Aleksanda inj Rufus da sad tamad, abanj lubanek ibiseig dal Jerusalem na yau ante Jesus irinani wo itor dugo, yu tamol adi dile ya. Inj disodudunig Jesus san aigim isini a. ²²Inj diaug aben ta lo dilasa, yajan Golgota. Yajak an fun igo ya, “Kabunjak tatu san aben.” ²³Aben ante dilasag, marasin yajan mirr dubol dan wain da dukubulig Jesus iluk o dupani a, ak gug inj ta iluk na ya. ²⁴Agog inj Jesus aigim fo dibali a. Inj dibali itout go injsed nug ilon lo injsan kulos dibititip anen anen kulos dijaneg wo ate satu dukok se ya.

²⁵Ad mitilaen 9 kilok, saen an lo Jesus aigim fo dibali a. ²⁶Ru ate kot dupani an, aigim fufo na dubali a. Ru en san sutek man, En Juda sad Kirj. ²⁷⁻²⁸Agog Jesus giranen na man, gumagam tamol wagai amad da yak nunod uraru inj dam aigim fo dubalaig dusujanai a. Injsad aigim man turan tuon won ak ate dugo, turan tuon nas ak ate duguni a. ²⁹Injanen ager adi diau dumul dugo nao futek ru wei mi tinin fo dubal dugo, kabunjad dukupari pani na ya. Inj dubol a, “Onj man tamol amaiak tempel ratitale idup, fon ad utol lo wabisa wo ubol a! ³⁰Aria, se patu ipaso wa, gamu en aigim biseip tan na udu wa!”

³¹Nek ago mi pris tutubui adi, kubiaenj san girek majau adi dam, sed lulunad lo kukok an digane se ya. Inj dubol se, “Inj tamol aenta patud ipasi na yak gug, sen patun ipasi san man tia ya! ³²En man Kristus, Isrel sad Kirj. An nijen o inj aigim ibiseip idu dop, an lo id tile dop ka ilod lo rumok a.” Dal kisaek mi lo tamol uraru a Jesus dida aigim fo dusujanai an dam nao futek ru wei mi tinin fo dukulmaek se ya.

Jesus imat a

Mat 27:45-56; Luk 23:44-49; Jon 19:28-30

³³Ad mitilaen 12 kilok an lo, tidom tubun tan yafutani geig go yang 3 kilok gurai isi a. ³⁴Saen kitek 3 kilok sumeik ipani dugo, Jesus awan tubun mi iwagin dugo ibol, “Eli, Eli, lama sabaktani?” Ru en fun igo ya, “Injsag Anut, naisag Anut, en ata wo naj bisawag ak i?”

³⁵Tamol aenta sumeikan dutur dan, ru en dulonj go ago dubol, “Alonj, tamol en man Elaija iwagi da.”

³⁶Ago dugo yu tamol ta inj imaspalu yau silatik onj go, mel ta beig san titalinj igo wonj ak injaneg, wain gigen an lo isominig, dumadum ate ifoug, Jesus awan te isou isudag iluk o iwate ya. Agog inj ibol, “Amoi dop id tile gup, nap Elaija ipalup aigim lo ipasip idu wo ipalu wak boi, nap tia boi.”

³⁷Agog Jesus awan tubun mi iwagiŋ go yaes ibal itout go imat a.

³⁸Saen nek amaiak lo mi, yamel tubun ak tempel lo iyuk yen an, o lak na fun iganeg imasireg yaug tan na idu ya, agog uraru dilasa ya. ³⁹Saen yu tamol sad gurman Jesus naon na itur an, Jesus wagiŋ dugo ilon, agod dal dugomaiak lo imat man, iŋ ibol, “Rumok geig, en man Anut Nanun!”

⁴⁰Pein adi aenta ate dumado se yan, asau mi dutur dugo leil digane ya. Luluŋad lo pein kisaek ta man taun Magdala san Maria, agod ta man Maria, Jems a bakan ak dubol dan iŋ Joses da tinadi, agod Salome. ⁴¹Pein adi an saen Jesus Galili ilon lo tureŋ yabi dugo dubunawi wo ŋien aban diri na ya. Pein aenta wei mi dam iŋ Jesus dida Jerusalem na dupalu yan luad disa dugo leil digane se ya.

Jesus san tubabun pat gubaran lo digane ya

Mat 27:57-61; Luk 23:50-56; Jon 19:38-42

⁴²Nal amaiak man yaŋan Kubunek Nal dubol da. (Nal tinin te ubou san nal.) Amaiak niŋen o saen gurai idu dugo, ⁴³Josef Arimatea san tamol, iŋ man Juda sad Sanhedrin kaunsil luluŋad lo tamol kisaek a, agod iŋ dam Anut san kagin panek ilasa wo malan igane se ya. Inŋen ilon yabisag Pailat san na yaug Jesus san tubabun ipani wo isumiani a. ⁴⁴Saen Pailat Jesus imat la yan ilon man, irut saian. Yu tamol sad gurman ipalu wo iwagi a. Iŋ ilasa dugo Pailat isumiani, “Dugo, Jesus imat la yak i? Tia, gamugo di?” ⁴⁵Yu tamol gurman an Jesus imat la yan irupe i a. Ago yak niŋen o Pailat Josef Jesus san tubabun ipani a. ⁴⁶Josef yaug yamel ikokan foun geig ak idad a, agog yaug Jesus san sisanun aigim fo ipasig, yamel an ate ibuluwig, isinig yau a. Agog mutou foun ak lo igane ya. Mutou an man pat san gib, gubak mi pat lo diabi a. Aria, Jesus san sisanun pat gib an ilon lo yen dugo, Josef pat muruan tinan ak ta ibili ipalug mutou awan ate ibalfutani a. ⁴⁷Ago dugo Maria, Magdala pein, agod Maria ta Joses tinan, nuŋod urarum Jesus dugon te digansig yen den leil dupani a.

Jesus fon kumaen imasa da ya

Mat 28:1-8; Luk 24:1-12; Jon 20:1-10

16 ¹⁻²Aria, ubou nal Sabat dubol dan itout go nal murna, ubou turan san nal malmalan ak, san salso sumeik idu se ya. Saen an lo taun Magdala san Maria, Maria ta iŋ Jems tinan, agod Salome, iŋ marasin uyan ak ate sisanun tinid dububuni wan diŋane diaug ate Jesus san sisanun dububuni wo mutou fun na diau a. ³Tureŋ diabi dugo iŋ nug dusumiani, “Enti mok pat tubun a mutou awan te yan ibilip yau panad ak i?”

⁴Mutou fun na dilasag malad diabisa man, pat tubun an dubulig yaug, gigin na yen dugo dile ya. ⁵Saen pat gubaran ilon lo diladu man, malad

yaug pinein ta yamel milkouk di milaen ak igane yan dile ya. Inj pat gubaran titin won ak lo imasig imado se ya. Dile man durut go direr saian geig a.

⁶Agog inj irupidai, “Anj arut arer amoi. Anj Jesus Nasaret san tamol aigim fo dibali amaiak abanja abi da. Inj kumaen imasa ya! Inj ete man tia ya. Apalup, aben e diganeg yen en ale. ⁷Ago yak nijen o amul aup, injanen megeloum adi, Pita dida, bilaluŋ en arupidai a, ‘Inj imug mi Galili na yau dop anj apalu wa. Onte gup ale wa, nek ibol inŋsen gubak mi irupidai ak ago ya.’ ”

⁸Agog pein utol an dusuruwor dugo ilod ibarkikaruk saian geig a. An nijen o pat gubaran dibiseig kuai te dilasag dusol go diau a. Inj ru ta tamolpein aenta lo mel an nijen o ta dubol ilasa na ya, man dugo, inj direr geig a.

Magdala san Maria Jesus ile ya

Mat 28:9-10; Jon 20:11-18

⁹Aria, Jesus imasa yak san nal man, ubou turan san nal malmalan ama ya. Saen an lo inj imug mi Magdala san pein Maria, naon na kuai isi dugo ile ya. Wagam mi Jesus ur sisaiak 7 pein an tinin lo ikudaig diau ak ama ya. ¹⁰Pein an yaug, tamolpein a gubak mi Jesus dida turenj diabi na yan, ilod ipapao dugo ditata onj se yan inŋsad na ilasag mel dugo ilasa yan nijen o irupidai a. ¹¹Ak gug saen Jesus kumaen imado dugo Maria ile man, ru ibol an nijen o ilod rumok man tia ya.

Megeloum uraru dal te Jesus dile ya

Luk 24:13-35

¹²Murnag tamol uraru gubak mi Jesus nien aban diri na yan, Jerusalem lubanek ilon lo turenj diabi se ya. Dal im diau dugo, Jesus naod na ilasa man naon tinin sen geig, agog dida diau se ya. ¹³Tamol uraru emaiak dumul diaug aenta durupidai a, ak gug inj tamol uraru an dam ilod lo ta rumok na ya.

Jesus megeloum murnap ata digane wak nijen o irupidai a

Mat 28:16-20; Luk 24:13-53; Jon 20:19-23; Apo 1:6-8

¹⁴Murna gug saen megeloum 11 ananj dunuai man, Jesus kuai isi dugo dile ya. Jesus ipidai a, man dugo, inj ilo rumok amad tia ya, agod ilod dabai geig ak onj inj tamolpein a Jesus kumaen imasa gug dile yan, inŋsad ru ilod lo rumok an nijen o dumoi a.

¹⁵Jesus irupidai, “Anj amasap, tan fidian lo ator dop, tamolpein fidian mi ante dumado dan bilaluŋ uyanan en afulalep duloŋ a. ¹⁶Ensauta a ilod lo rumok pe suguek diŋane dan patu pasek diŋane wa. Ak gug ensauta a ilod ta rumok na yan kot lo diau dudup dideg diau a. ¹⁷Agod kulob naok

igo yan man, tamolpein a ηai o ilod rumok dan dida diau a. In ηai yanag lo ur sisaiaik adi dukudaip diau ak, in muroun ru sensen ak diηanep ate diηiηeη a. ¹⁸In sed banid nam mot wagai ak dubouro a. In marasin saiaik ta tamol ifuni imat san ka duluk a, gug ta dumat na wa. Agod iηaned banid subam adi tinid fo diganep uyadi da wa.”

Jesus kumaen panu na isuda yau a

Luk 24:50-53; Apo 1:9-11

¹⁹Tubun ak Jesus ru an fidian irupidai itout man, Anut in iηaneg isuda yaug kumaen panu na ilasa ya. Ante man in Anut san aben malan te banin won ak lo imasig imado da. ²⁰Agog iηanen megeloum adi dufurak go, gidigidad diaug iηanen ru dubol ilasa na ya. Agod Tubun en in sen in dida urat digane se ya, ago dugo kulob funfun kob aman da idiri dilasa yan lo tamolpein dile man, iηanen ru man ru rumok a.